

MULIMU YAMATA

HAIPATULULA FAPILA LUNA

 Ni na ni Mañolo nyana añozwi fa, ao Ni tabela kubulela ku mina ka ona, mi Ni sepa kuli Mulimu uka fuyola ku itiisa kwa luna ko ku nyinyani.

² Cwale, batu babañata ba komokanga libaka le lubezi baba ipitezi mi ba lilata hahulu. Mwa ziba, wo ki mufuta wo shutana wa—wa mukopano kufita seo sicaba si—si twaezi ku bonanga. Mi, hañata, lika kaufela ki mufuta wo ketuhile mi o omile. Kono ha lutaha kwa mikopano ye, ye se bile tohonolo yaka cwale ka myaha nyana kuzwa fo i kalezi, mi halu zibi hande se lu ka eza. Lu tahanga fela mi lu ipa ili luna. Yani kona taba fela ye lu ziba mwa ku ezeza. Mi Mulimu upeta ze siyezi za teni. Kacwalo sani si lueza batu baba ipitezi hahulu mwa kueza lika.

³ Zazi leliñwi, yomuñwi naize, “Wa ziba, mina batu luli mu baba ipitezi.”

Se nili, “Kulukile, Ni—Ni sepa lu cwalo.”

⁴ Mi Ni hupula ka ulimuñwi wa mikopano. Muzwale Troy nako yeñwi ka mu German yomunyinyani yana bulezi kuli na amuhezi kolobezo ya Moya o Kenile. Mi ka lelitatama, mwa sintolo kwa na beleka, na nanulanga mazoho ahae ni ku lumba Mulena, ni kubulela ka malimi ni ku zwelapili, ka bumaswe. Mi mafelelezo, mulena hae ataha mi ali, “Heini, ki butata mañi bobuli ni wena?”

⁵ Ki hali, “Oh, Ni pilisizwe.” Mi ali, “Pilu yaka iyuboka fela tabo.”

⁶ Yena ali, “Kulukile, ulukela kuba yanali ni sikhata sani sa lyanganu kwani.”

⁷ Yena ali, “Eeni. Kanya ku Mulimu!” Ali, “Ku lumbwe Mulena ka lyanganu.” Ki hali—ki hali, “Unge mota, utahe cwalo mwa mukwakwa.” Ali, “Uzuse za kutamisa lisipi kaufela kuzwa ku yona, hakuna sokaba ni sona kwanda sishañata sa ‘bingengemwa.’” Mi sani ki . . . Ki ze ama fela bunde, wa ziba.

⁸ Zazi leliñwi, mwa California, Ne nisweli kuzamaya mwa mikwakwa ya Los Angeles, mi Na tobona muuna yana apezi sisupo sesiñwi fa sifuba sa hae, ni *fa*. Mi na ize, “Ni sikuba sa Kreste.” Mi mutu kaufela nasweli ku mutualimela. Mi Ne ni lemuha kuli neba sweli kuitemunanga ni ku kutalima, ha sa fitile. Mi Na hupula kuli Ni ka latelela cwalo ni babañwi. Mi haili *fa* . . . mukokoto wa hae, na ize, “Wena u sikuba sa mañi?” Eeh. Na sepa luna kaufela lu mwa mufuta buipiteli, yomuñwi ku yomuñwi, mwa ziba.

⁹ Kono, mwa ziba, lifasi likeni mwa mukokolombwa o cwalo, kufitela sesiñwi sesi shutana si lipanga kuba leli ipitezi hahulu, kufitela sicaba si nahana kuli kuna ni se si fosahalile. Mi kamita Mulimu una ni kueza sika se si ipitezi, kunga batu ku ba kutiseza kwa Bibele hape.

¹⁰ Na kona ku nahana kuli Nuwe nali mufuta wa—wa lyanganu, kwa lusika lwa ba sayansi lwani mwa na pila, kakuli ne ba kona ku batisisa kuli ne kusina pula mwa halimu. Kono Mulimu naize kuli kukaba yeñwi kwani. Kacwalo, Nuwe, ka kukutaza ni kulumela cwalo, afetuha kuba sanganu.

¹¹ Mi Ni hupula kuli fani Mushe ha na ile kwa Egepita, nali mwa mufuta wa—wa sikuba, ku Faro. Kono muhupule, Faro nali sikuba, ku yena, cwalo. Kacwalo ba . . . Lu lemuha cwalo.

¹² Nihiba Jesu na talimiwa kuli neli wa likañi. Yani ki niti. Martin Luther nali sanganu, kwa keleke ya Katolika. Mi John Wesley nali sanganu, kwa ma Anglican. Kacwalo, mwa ziba, seli—seli nako ya sanganu sesiñwi. Nji hamu boni cwalo? [Puteho ili, “Amen.”—Mu.] Kono, kusika ba kale sitamiso, mwaziba, kuna ni kuba sibaekiso, pili, sa ku swalana ku sona.

¹³ Kacwalo, mwa ziba, Nuwe, kakuba sikuba, na . . . Kubanga sitamiso, se sihoha sibaekiso, kuhoha lika hamoho, ni kuswala lika hamoho. Kacwalo, Nuwe naka kona kuhoha kaufela bane ba ka lumela, kukena mwa areka, kuzwa mwa katulo, ka kuba sitamiso.

¹⁴ Lu fumana cwana, kuli, Mushe na hohile keleke kuzwa mwa Egepita, ka kuba sitamiso. Yani ki niti.

¹⁵ Na sepa lu tokwa sitamiso cwale, sa kuhoha Munyaliwa kuzwa mwa keleke. Lu tokwa sika sesiñwi cwale, yomuñwi, kuli lube sicaba se si ipitezi hahulu ka mufuta wa sona. Mi Na hupula busihu bwa kacenu, busihu bwa kacenu, haiba Mulena a lata, Ni ka lika kubala Mañolo nyana azamaeleta ni se, mi ni ka bulela ku mina fa nako nyana fela ye likani, ni kulika ku mibona kuli kiñi haluli sicaba se si ipitezi hahulu.

¹⁶ Halu sikuluhele ni kwa Mañolo cwale, mwa Mafilipi kauhanyo ya 2, 1-8, ni Makorinte ba Bubeli 3:6. Mi ha lu baleni, halunze lu lumela Linzwi la Mulimu.

¹⁷ Mi cwale, lusika bala fela kale, halu inamiseni litoho kwa tapelo.

¹⁸ Ndate Yomunde yakwa Lihalimu, luna kaniti lu sicaba sesi na ni litohonolo, busihu bwa kacenu, ka kupila mwa lusika loo, ni kubona lika ze lubona ha liswelii ku ezahala, ni kuziba kuli nako i sutelezi bukaufi, fo Jesu aka tahela Keleke ya Hae. Oh, sani si nyakalalisa lipilu za luna, Mulena! Mi sina ha lunze lu kwalula makepe, busihu bo, lu lapela kuli Ulufe tuto kuzwa mwa palo ye. Mi Moya o Kenile u patulule kwa lipilu za luna lika ze

kaba zende mi ze tabisa ku Mulimu. Kakuli lwa likupa ka Libizo la Jesu. Amen.

¹⁹ Mwa ziba, ni lumela kuli Ni ka mi kupa kuli mueze nto iliñwi. Ni—Ni kupanga lika zenza kamita, mi Ni sepa kuli ha Ni kupi sika se si nca. Kono ha lu fanga likute kwa ndembela, lwa yemanga. Mi—mi ndembela ha i pepela cwalo, lwa yemanga; yeli, nto ye lu lukela kueza. Mi lwa yemanga, ka likute. Halu yemeni fela halunze lubala Linzwi, haiba mwa kona, Makorinte ba Bubeli 3:6.

Yena...ya lu ezize babuleli ba testamente ya bubeli; isi ka liñolo, kono ka moyo: kakuli liñolo la bulaya, kono moyo wafa bupilo.

Kono haiba—haiba sebelezo ya lifu, yeñozwi mi ifaluzwi fa macwe, neli ye kanya, kuli bana ba Isilaele neba palelwa ku bona pata ya Mushe bakeñisa kanya ya sifateho sa hae; ili kanya yene na ni kufela:

Kana kukaba kanya ye cwani kwa sebelezo ya moyo?

Kakuli haiba sebelezo ye nyazahala iba ye kanya, kikuli sebelezo ya kuluka ina ni kanya yetuna ni kufita.

Kakuli nihaiba sene si ezizwe se si kanya ne si sina kanya ka mubulelelo wo, kuya ka buino bwa kanya yetuna ni kufita.

Kakuli haiba sani sene sifela ne si na ni kanya, kucwañi...kamba kucwañi he kuse si siyezi ha si ba ni kanya.

Ka kubona kuli luna ni sepo ye cwalo, lu bulela ka mushobo o utwahala.

Mi isiñi sina Mushe, yana i kapesize lisila kwa pata ya hae, kuli bana ba Isilaele bupalelwé ku talima kwa mafelelezo a nto yene fela:

Kono mihipulo ya bona nei bofalile: kuto fita ni kacenu kapai kaka swana haka sika fela ha kubalwa litaba za testamente ya kale; ili kapai kaka feliswa ki Kreste.

Kono kutofita ni lizazi le, ha kubalwa Mushe, kapai kao kasali fa lipilu za bona.

Kono ka nako ye ku sikuluhelwa ku Mulena, kapai kaka feliswa. Isi...

Cwale Mulena kona Moya: mi ko ku inzi Moya wa Mulena, kuna ni tukuluho.

Kono luna kaufela, ka meto atona lwa bona sina mwa siiponi ona kanya ya Mulena, ili kucinca ko kuswana kuzwa kwa kanya kuya kwa kanya, ili kuya ka Moya wa Mulena.

²⁰ Mi mwa Mafilipi 2, lubala cwana, kukala kuya 1, ni kubala ku yofita fa timana yabu 8.

Haiba—haiba kuna ni ze tiisa pilu ku Kreste, hakuna ni ze toba pilu mwa lilato, . . . hakuna ni kopano ya Moya, hakuna ni makeke ni ku utwelana butuku,

Mu petahalise tabo ya ka, kakuba ni muhupulo ulimuñwi, ni lilato lililiñwi, ni moyo u limuñwi, ni ku ikutwa ku likuñwi.

Musike mwa eza sesiñwi ka kañi kamba ka buipabazo bwa fela; kono ka buikokobezo mutu ni mutu ahupule kuli babañwi ba mufita.

Mutu mañi kamba mañi asike atokomela za hae fela, kono mutu kaufela hape ku za . . . babañwi.

Mube ni maikuto ana liteni, ni ku Kreste Jesu:

Niha, nana ni sibupeho sa Mulimu, na si ka li ku likana ni Mulimu kinto yana ka hanelela:

Kono aitoboha ku sa nali sona, ka kunga sibupeho sa mutanga, mi aezwa ya swana sina batu:

Mi hafumanwi ali sina mutu, a ikokobeza, a ipeya ku utwa ku isa kwa lifu, mane lifu la sifapahano.

²¹ Halu lapelefñi.

²² Ndate yakwa Lihalimu, Linzwi lelituna le libalilwe, busihu bwa kacenu, kuzwa mwa Likatulo za Hao ze Kenile, u Li eze kuba la niti kwa lipilu za luna, kuli luye kuzwa mo sina bani bene bazwa kwa Emausi, hane bali, “Kana lipilu zaluna ne li sacisi mwahali ku luna ha Na bulela ku luna mwahala musipili?” Kakuli lwa likupa ka Libizo la Jesu. Amen.

Mwa kona kuina.

²³ Cwale, ye ki palo ye ipitezi luli, kono Ni sepa kuli ya lukela luli ka nako ye. Ne nibata kubulela fa tuto yeli: *Mulimu Yamata Haipatulula Fapila Luna.*

²⁴ Cwale, kwali kukala kuba batu, kubile tala mwa pilu ya mutu, kuli afumane kwa zwelela, ni libaka la hae la kuba fa, ni kwa ya. Kuna ni fela Alimuñwi yakona kualaba sani, yani ki Ya Na mutisize fa. Mi mutu nako kaufela ubile abata kubona Mulimu.

²⁵ Kwa mulaho mwa Testamente ya Kale, lufumana kuli Mulimu na ipatile Iliyena. Mulimu una ni nzila ye ipitezi hahulu ha talimana ni batu. Wa ipatanga Iliyena ku ya sa lumeli ni ku i patulula Iliyena ku mulumeli. Mulimu uezanga cwalo. Jesu na lumbile Ndate, kuli, Na patezi lika ze kuba ba butali ni ba ngana, ni ku Li patululela kwa limbututu ze kona ku ituta. Kacwalo, lu fumana kuli Mulimu ha cinci, mwa sibupeho sa Hae, mi Yena uezanga musebezi wa Hae ka kuswana kamita. Lufumana cwana, mwa Malaki 3, kuli Na ize, “Ki na Mulimu, mi

ha Ni cinci.” Kacwalo, U belekanga ka mulao oswana, ka nako kaufela.

²⁶ Cwale lunge iliñwi ya libuka za kale hahulu za Bibebe. Fani Jobo, alimuñwi wa baana baba kenile hahulu ba mwa lizazi la hae, muuna ya petehile mwa milao ya Mulimu, mutanga, ya ishuwile, mutanga ya kutekeha, kufitela mane Mulimu abulela kuli, “Hakuna ya swana ni yena, mwa lifasi.” Kono...takazo ya hae, nako yeñwi, neli kubona Mulimu. Na zibile kuli kuna ni Mulimu, mi na ikutwile kuli nabata ku Mu bona, kamba, nihaiba, kuya ku ndu ya Hae ni ku yo ngongota fa munyako, ni kuli, “Ni bata kubulela ni Wena.” Aine fafasi, ambole ni Yena, sina molu ezezanga ku yomuñwi ni yomuñwi.

²⁷ Luna ni kutwisiso. Kona ha luli mwa mikopano ye, ko lu tahanga hamoho ni—ni ku bonahalisa milelo ya luna. Mi—mi lwa utwana yomuñwi ni yomuñwi, hande, halu ambola litaba ku yomuñwi ni yomuñwi. Mi babuleli baezanga cwalo. Batu ba miinelo kaufela ya bupilo ba ezanga cwalo, kubulela litaba kufeza.

²⁸ Mi, Jobo, Mulimu nali wa niti ku yena, nabata kufumana haiba na si ke kuya kwatenei, kuyo ngongota fa munyako wa Hae, mi—mi abe ni—ni ngambolo ni Yena.

²⁹ Kono lufumana kuli Mulimu nabulezi ni yena, kono Na ipatile. Na ipatile mwa mufuta wa kakundukundu. Mi Na bulelezi Jobo kuli aitame mwa teka ya hae; Na ka bulela ni yena, sina mutu. Mi A taha kushetumuka mwa kakundukundu ni—ni kubulela ku Jobo. Mi A itibahaza ku Jobo kufitela mwa kakundukundu, kono niteni ka si ka Mu bona luli. Na utwa fela moyo hau fuka ni ku tinguluka, mwa likota. Mi Linzwi la zwa mwa kakundukundu, kono Mulimu na patilwe mwa kakundukundu.

³⁰ Lufumana, kwani mwa Africa, South Africa, ba itusisa linzwi la kuli *amoyah*, le litalusa, “mata asa bonahali.”

³¹ Mi Mata asa bonahali a, mwa kakundukundu, nana ni Linzwi leli utwahala. Ne libulezi ku Jobo, kono niteni na si ka bona sibupeho sa Hae. Kono Na ipatile, ku yena, ka kakundukundu.

³² Lufumana alimuñwi wa bapolofita ba batuna ba kale ba Bibebe, Mushe, wa Testamente ya Kale, alimuñwi wa baketwa ba Mulimu, batanga ba baketilwe, baba lemuhilwe isali kwa makalo, ni yena hape na lakalize kuli a Mu bone. Nali bukaufi hahulu ni Yena, mi naboni lika zeñata hahulu ze komosa za lizoho la Hae inze li zwelapili ku ezahala zene kona fela ku eziwa ki Mulimu. Na lakalize ku Mu bona zazi leliñwi, mi Mulimu amu bulelela kuli, “Zamaya, yema fa licwe.”

³³ Mi hana sa yemi fa licwe, Mushe a Mu bona hafita. Na boni mukokoto wa Hae. Mi ki hali, “Ne ubonahala sina mutu,

mukokoto wa muuna.” Ibo, na si ka bona Mulimu. Na boni fela siapalo sa Mulimu.

³⁴ Bibebe ibulela kuli, “Hakuna mutu yakile abona Mulimu ka nako kaufela, kono kwanda mwana wa Libanda yazwa ku Ndate ki yena ya Mu pakile.” Kacwalo, Mushe na Mu boni, inza ipatile, sina Mutu. Lufumana kuli Jehova wa Testamente ya Kale naswana fela sina Jesu wa Testamente ye Nea.

³⁵ Mi—mi Muituti Scofield fa, lufumana cwana kuli, linzwi la hae, liya li cinca kuzwa kwa kuba “mufuta.” Lufumana linzwi la kuli *en morphe*, mwa si Gerike, le litalusa kuli “ze sa bonwi neli eziwe ze bonahala.” Sika sesi sa konahali . . . Luziba kuli si teni. Sa kona kuba . . . hasikoni ku bonahala, kono kanti luziba kuli siteni fani. Mi ha Na cincize mufuta wa Hae, wa bu *en morphe*, ili kutalusa kuli Na cincize kuzwa ku za moya kutaha ku za butu.

³⁶ Mi Na cincize fela siapalo sa Hae, mwa miinelo yemiñwi, kuswana sina papali. Na sweli kueza sika. Mi mwa si Gerike, fani hane baka cinca liapalo za bona, mwendi papali iliñwi . . . mubapali alimuñwi naka bapala mwa likalulo ze shutana zeñata nyana.

³⁷ Mi mwanaka wa musizana, yaliteni fa, neba nani kwani kwa sikolo sesi pahami, pa—pa papali. Mi mushimani alimuñwi yo Ni ziba, na bapala mwa likalulo zene, kono nasweli kuya kwa mulaho wa lisila lene ba beile ni kuyo cinca siapalo sa—sa hae, kuli azwele kwande, inza likanyisa mutu yomuñwi.

³⁸ Cwale, haiba mukanga sipolofita sa Testamente ya Kale kuya ka seo Mesia na lukela kuba, mwa kona ku si bapisa kwa bupilo bwa Jesu, mi mufumana handende ka seo Jesu nali sona. Yena nasi mutu wa fela fela. Nali Mulimu, *en morphe*. Na cincizwe kuzwa—kuzwa kwa kuba wa moya kutaha kwa kuba Mutu. Ibo, Nali Mulimu, na iponahalize mwa nama, na ipatile mwa mubili wa butu, siapalo sa nama.

Mi mutualime mwa Testamente ya Kale.

³⁹ Ni—Ni—Ni ziba kuli Ni bulela ni sikhwata sesi kopani, busihu bwa kacenu, baba zwa mwa libaka zeshutana za lifasi. Mi lutile kwanu kuto batisia. Ki sikamañi se lu—ki sikamañi se lu eza? Kiñi—kiñi seo luli sona? Ki kai ko luya? Kiñi ze ezahala? Ki sikamañi seo sitalusa se?

⁴⁰ Mi cwale lufumana cwana, mwahali mo, kuli, haiba mina baana ni basali ba si Juda, ni baluti mwa—mwa—mwa tempele, mwa mazazi afelile, kambe ne ba lemuhile Bibebe, ni bupolofita, kufita kueza lizo, neba ka ziba yo Jesu nali yena. Neba si ke ba Mu biza kuli Balezebubi. Neba si ke ba Mu kokotela. Kono, kaufela zona ne li na ni ku hanyezwa. Sani kona siemba sa taba ye. Mi ne ba foufalizwe, mwa taba ye.

⁴¹ Ku swana sina buñata bwa mina baana, basali, mo busihu bwa kacenu, mwendi mu likana ni na kamba muhulile nyana.

Mwa hupula, kwanu mwa America, myaha yefelile, kusika taha...Kale ma Chinese...Muzwale waka, yasa zo zibiswa kwanu, sani sitile mwa munahano waka ha ne Ni sweli ku ambola ku yena. Kamo ne basweli ku ezezanga...Ne ba sa zibi kubulela Sikuwa, mi neba—neba beleka za ku tapisa ni ku lukisa libyana. Mi muya kwa musebezi wa hae wa ku tapisa, kuli ba mi lukiseze libyana za mina. Baana—baana ba si Chinese ba nebanga kasila ka zibahazo, mi neba ka pazula mwa mufuta omuñwi. Munga siemba silisiñwi sa kasila kani; yena usiala ni kakañwi. Kono ha mu ka yo kuta kuto bata lika za mina, tuembra totubeli twa mapepa twani ne tu lukela ku lumelelana. Mi haiba ha tu lumelelani fela hande... Ne kusina mukwa one muka kona ku tu likanyisa kaufela, kakuli yena nana ni kaemba kakañwi ni mina muba ni kakañwi. Mi haiba neka ka likanyiswa... Kona kuli muna ni tukelo ya kubata zeli za mina. Mi kipeto muba ni zeli za mina, fani ha muna ni siemba sesiñwi sa tumelelano.

⁴² Ku cwalo, busihu bwa kacenu, ha luna ni siemba sesiñwi sa tumelelano. Fani, Mulimu hana pazuzi Mwana Hae mwa liemba zepeli, fa Kalvari, kunga mubili ku upaheka kuba Sitabelo, ni ku lu lumela Moya kukuta ku luna, wani o kile wa pila ku Mutu, yena Jesu. Yena Mulimu yaswana yani uinzi mwa siapalo kacenu, mwa mufuta wa Moya o Kenile. Liemba zepeli zani li lukela kutaha hamoho, kona muba siemba sa tumelelano. Mulimu naezize se, ili kuli azibahale hande ku mutu, fani ha Na ikezize Iliyena kuba Mutu.

⁴³ Ne nisweli kubala likande, lilimo zeñwi zefelile. Mi mwa likande le, neli ize mulena ya ishuwile, yomutuna...Ni libezi libizo la hae, cwanoñ fa. Ne ni sa hupuli kaza ku kandeka likande. Lona, mwendi ki buhata, kono li luisa kwa taba ye lufa makalelo a ze lubata kubulela fateni. Mulena yo, nali mulena ya ishuwile hahulu, mi na lata hahulu sicaba sa na busa, kufitela, zazi leliñwi, fapila mulibelei wa—wa hae ni bulena bwa hae, ali, “Kacenu, muka ni bona lwa mafelelezo, ka lilimo zeñata.”

⁴⁴ Mi balibelei ba hae ni manduna ba hae bali kuyena, “Mulena yomunde, kiñi ha ubulela cwalo? Kikuli uya kwa na ha ya kwahule, kokuñwi, kuyoba mu icambaeli?”

⁴⁵ Yena ali, “Batili. Ni ka pila ona mo. Kulukile,” ali, “Ni ya kwande mwahala sicaba seni busa. Ni ya kwa kuba mulimi. Ni ya kwa kulemaka likota ni balemi. Niya kwa—kwa kuyo kampa mubu ni bakampi. Ni ya kwa ku yo kolela lisansa za veine hamoho ni bani baba kalelanga li veine. Ni ya kwa kuba alimuñwi wa bona, kuli nibe ni kuziba hande se basweli ku eza. Mi Na balata. Mi Ni bata kuli nibe ya itwaeza hahulu bona, kasibili. Ha ba na ku ni ziba. Kono, niteni, Ni bata kutwaelana ni bona, ka nzila yani.”

⁴⁶ Mi kakusasana ka lelitatama, fo manduna hae, sicaba sa hae kaufela sinze si mu bona, kamba bani bene bali mwa muleneñi,

ha tubula mushukwe wa hae ni kubeya fa sipula, fa lubona; ni ku tubula mukanjo wa hae, ni kuapala liapalo za balimi, azwela kwande mwahala batu ba basina kabubo.

Cwale, mwa likande nyana leo, lufumana teni za Mulimu.

⁴⁷ Neba ize ku mulena, bali, “Mulena, lwa kubata. Lwa ku lata. Luna—luna lubata kuli uine uli mulena.” Kono yena nabata kuba alimuñwi wa bona, kuli abazibe hande, kuli ba muzibe hande ka bunolo, luli seo nali sona. Na ka ba bonisa sanali sona luli.

⁴⁸ Mi sani kona sa na ezize Mulimu. Na—Na i cincize Iliyena, kuzwa kwa kuba Jehova Mulimu, ku toba alimuñwi wa luna, kuli Akone ku nyanda, Akone ku tatuba lifu, Akone kuziba seo buhazo bwa lifu nebuli sona, ni kunga koto ya lifu kuipeya yona fahalimwa Hae. Na beile kwa tuko kuwani ya Hae—Hae ya bulena ni mukanjo wa Hae, mi atoba alimuñwi wa luna. Na tapisize mautu aba—aba—ba shebile. Na pilile mwa litende, ni ba botana. Na lobezi mwa—mwa mushitu ni mwa mikwakwa, ni bani bene basina litohonolo. Na tiloba alimuñwi wa luna, kuli Akone ku lu utwisisa hande, ni kuli ni luna lukone ku Mu utwisisa hande.

⁴⁹ Cwale, Na sepa, ku sani, lu fumana kuli, ku cinca, Iliyena, sa Na ezize. Haiba muka lemuha, Na tile ka libizo la bana babalalu. Na tile ka libizo la Mwana mutu, mi ni ku la Mwana Mulimu, ni libizo la Mwana Davida. Na tile sina Mwana mutu.

⁵⁰ Cwale, mwa Ezekiele 2:3, Jehova, Yena luli, na bizize Ezekiele, yena mupolofita, “yena mwana mutu.”

⁵¹ *Mwana mutu* utalusa “mupolofita.” Na nani kutaha ka nzila yani, ku taleleza Deuteronomia 18:15, leo Mushe naize, “Mulena Mulimu wa mina uka zusa mwahala mina mupolofita yaswana sina na.” Na si ka ipiza Iliyena kuli ki Mwana Mulimu. Na italusa Iliyena, “Mwana mutu,” kakuli Na nani kutaha kuya ka Mañolo. Mwabona? Na nani kueza kuli liemba zepeli za mapampili zani zene pazuhile, ili sipolofita sa Testamente ya Kale ni buino bwa Hae Sakata, kuli libe hande ze swana. Kacwalo, Na tile, yena Mwana mutu, natile mwa mufuta wani.

⁵² Mi lufumana kuli, kasamulaho wa lifu la Hae, kupumbekwa, ni zuho, Na tile ka Lizazi la Pentekota, kakuba Mwana Mulimu; Mulimu, ona Moya, mwa mufuta, Moya o Kenile. Ki sikamañi sa Na eza? Na sweli ku i cinca Iliyena, kuikeza Iliyena kuba ya zibahala kwa sicaba sa Hae mwa mufuta o shutana. Sina, Moya o Kenile, oli Mulimu, Na tile kwa kuto talimana ni linako za likeleke ze, sina Mwana Mulimu, ona Moya o Kenile.

⁵³ Kono, mwa puso ya Mileniamu, Utaha sina Mwana Davida, kuto ina fa lubona lwa Davida, Mulena. Na lukela kunga lubona lwa Davida. U inzi fa lubona lwa Ndate cwale. Mi cwale ki Hali, “Ya tula uka ina ni Na mwa lubona lwa Ka, sina Na ha ni tulile mi niinzi ni Ndate Mwa lubona lwa hae.” Kacwalo, Yena, mwa puso

ya Mileniamu, Ukaba Mwana Davida. Ki sikamañi sani? Kiyena Mulimu ya swana, nako kaufela, u cinca fela siyaba Sa—Sa hae.

Na, ku musalaka, ni muuna hae.

⁵⁴ Kana mulemuhile? Musali wa Mukanana, “Wena Mwana Davida, ube ni makeke.” Yena, mane na sika Mu lemuha, ni hanyinyani. Musali yani nasina swanelo ya ku Mubiza cwalo. Nasina tukelo ya ku Mu biza kuli Mwana Davida. Yena nali... Ki Mwana Davida, kwa Majuda. Mi cwale ki Ha taha... Kono fani musali hana Mu bizize, “Mulena,” Nali Mulena wa hae, ki ha ikungela sa na kupile.

Cwale, sina, Yena usweli fela ku i cinca Iliyena.

⁵⁵ Cwale, mwa lapa laka, Ni nani batu babalalu baba shutana. Mwa lapa laka, musalaka uni biza kuli ni muuna hae. Mwanaka wa musizana kwani, yena hana tukelo ya ku ni biza kuba muuna hae; Na ni ndatahe. Mi ni miukulyange kwani, Na ni kuku wa hae, kacwalo haana tukelo ya kuni biza kuli ndate. Na hani ndatahe. Mwanaka wa mushimani ki yena ndatahe. Na ni kuku wa hae. Kono Ni sali mutu yaswana.

⁵⁶ Mi Mulimu, seo A eza, Yena usweli fela ku i cinca Iliyena, kutaha kwa lusika lwani, ku itibahaza Iliyena kwa sicaba sani. Mi sani kona se lutezi kuto batisisa, busihu bwa kacenu. Ki ka nzila ifi yeo Mulimu alukela ku itibahaza Iliyena kwa sicaba se mi ni mwa nako ye? U cincanga siyaba sa Hae, U cincanga mukwa wa Hae, kono Ha cincangi sibupeho sa Hae. Ha cincangi sibupeho Sa—Sa hae. Yena ucincanga fela siyaba sa Hae, kuzwa ku yomuñwi kuya ku yomuñwi. Wa ezanga cwalo, kuli ha i patulule Iliyena ka kupatuluha luli kwa sicaba, kuli bakone kuziba yo Ali yena, ni seo Ali sona.

⁵⁷ Mwa Maheberu 1, lwa bala, “Mulimu, mwa linako za kale ni linako zeñata nabulezi ku kwa bashemi baikale, ka bapolofita, kono mwa mazazi a mafelelezo a kufitela ku Mwana Hae, Jesu.”

⁵⁸ Cwale, “Bapolofita,” Jesu naize kuli, ha Na sa li fa lifasi fa, “nebali balimu. Kono mina mubiza bani kuli ‘balimu,’ ili bao Linzwi la Mulimu li tahile ku bona. Mi Mañolo hakoni ku fosa,” Na ize. Kuli, “Muka Mu nyaza cwani he, hali Yena Mwana Mulimu?” Mwabona?

⁵⁹ Linzwi la Mulimu litomilwe mwa lusika kaufela, seo Li lukela kuba lona. Mi Jesu nali mutalelela wa sipolofita kaufela. “Ku Yena ku inzi mutalelela kaufela wa Bumulimu ka mubili.” Ne uli ku Yena. Nali Yena yanali ku Josefa. Nali Yena Yanali ku Elia. Nali Yena Yanali ku Mushe. Nali Yena Yanali ku Davida, yena mulena ya hanilwe.

⁶⁰ Sicaba sa Hae tota ne si mu hanile, kuba mulena. Mi ha naile kwande—kwande a munzi, buhule nyana, mutu ya holofezi inza lila hafita, neba sika tabela mubuso wa—wa hae, puso ya hae, mi ba mukwela mati. Mi mulibelei acomola mukwale wa hae,

ali, "Kana Ni siye toho ya nja yani ku yena, kukwela mati ku mulena ka?"

⁶¹ Mi Davida, mwendi na sa lemuhi sa na sweli kueza ka nako yani, kono na tozizwe. Mi ki hali, "Mu mutuhele ona cwalo. Mulimu umu bulelezi kueza se." Mi ki ha pahama fa lilundu ni kuyo lilela Jerusalema, mulena ya hanilwe.

⁶² Kana mu lemuhile? Myaha ye mianda yelikani kuzwa fani, yena Mwana Davida inza kwelakiwa mati, mwa mikwakwa, mi nali fa lilundu, lona lilundu leli swana, ali kutalima fahalimwa Jerusalema, Mulena ya hanilwe. Mi a huwa kuli, "Jerusalema, Ni ka ku babalela nako yekuma kai sina kuhu kwa tuzwinyani twa yona, kono ha ulati!"

⁶³ Na si ka cinca sibupeho sa Hae, kakuli Maheberu 13:8 ili, "Ki yaswana maabani, kacenu, ni kuyakuile." Mulimu na ezizwe nama, ili kuli ashwe, ku lu liulula kwa sibi. Ki kabakaleo Na i cincize Iliyena, kuli abe—abe Mutu.

⁶⁴ Lwa bona, ku Mulatiwa Joani 12:20, Magerike neba utwile za Hae. Cwale, hakuna mutu yakona kuutwa za Hae konji pilu ya hae itabele ku Mu bona. Sina Jobo ni bapolofita ba kale, kaufela bona ne ba bata ku Mu bona. Kacwalo, Mugerike yo ataha ku to Mu bona. Nebatile ku Filipi, wa kwa Betisaida, bali, "Shangwe, lu lata ku bona Jesu."

⁶⁵ Magerike neba bata ku Mu bona, kono ne ba sa koni ku Mu bona kakuli Na li mwa tempele ya butu bwa Hae. "Mulimu nali ku Kreste, inza kutisana lipilu za lifasi ku Yena." Cwale lufumana kuli, mwahali mo, kuli Magerike ba neba sika Mu bona.

⁶⁶ Mi mulemuhile manzwi luli ao Jesu naitusisize ku bona, hasamulaho. Na ize, "Haisi kuli peu ya mbonyi iwele mwa mubu, i shwe, ika siala inosi." Ka manzwi aman̄wi, neba sike bakona ku Mu bona mwa kucinciwa, mwa siyaba sa Na li kusona nako yani, kakuli Na ipatile mwa nama ya butu. Kono fani peu ya mbonyi ya Buloto ye hane itowela mwa mubu, ne I tilotisa masika kaufela. Na lumezwi kwa Majuda, ka niti, ka nako yani. Kono mbonyi ya Buloto ye i swanezi kuwa; Mulimu ya patilwe, mwa nama ya butu, kupatiwa ku ba basa lumeli, kono ni ku patululwa kwa balumeli.

⁶⁷ Mwa Joani 1, "Kwa simuluho nekuna ni Linzwi, mi Linzwi nali ku Mulimu, mi Linzwi neli Mulimu. Mi Linzwi la eza nama, mi lato yaha ku luna, mi lwa Mu bona, yena mwana wa Libanda yazwa ku Ndate, atezi sishemo." Cwale, kwa simuluho nekuna ni Linzwi. Linzwi ki muhupulo o boni sizwe.

⁶⁸ Kwa simuluho, Yena mane nasi nihaiba Mulimu. Cwale, linzwi la luna la Sikuwa kacenu, *Mulimu*, litalusa "sibupiwa se si lapelwa." Ka mo li lyanganiseza mwa muhupulo. Mwakona ku eza mutu yomuñwi kuba kalimu. Mwakona kueza sika kaufela kuba kalimu.

⁶⁹ Kono mwa Testamente ya Kale, mwa Genese 1, “Kwa simuluho *Mulimu*,” linzwi le li itusisizwe, Elohim. *Elohim* litalusa “ya ipupile Iliyena-anosi.” Ki shutano kwa butuna ni yeo linzwi lelili Elohim litalusa, kwa linzwi la luna la Mulimu. *Elohim* italusa “ya ipupile Iliyena-anosi.”

⁷⁰ Luna halukoni ku ipupa luna bañi. Luna halukoni kuba baba pahami, baba mata kaufela, kuba kai ni kai, kuziba lika kaufela. Yena Elohim yani ubonisize lika zani kaufela. Luna halukoni kuba sani. Ona kota yemu eza kalimu ku yona, kamba ona—ona muyaho, ha u si ka ipupa ona uñi.

⁷¹ Kacwalo, Mulimu, kwa simuluho, nali Bupilo, yena Wa Kuyakuile. Ku Yena nekuna ni milelo, mi milelo yani ya toba Manzwi, mi Linzwi laezwa nama. Jesu nali Muliululi. Mi ku *liulula*, kutalusa, “ku kutisa.” Haiba Una ni ku kutisa, ne si na ni kuba kokuñwi kuli si tahe fateni. Kacwalo, mwa bona, sicaba kaufela hasina kukona ku sibona, kakuli sicaba kaufela nesi si yo kwa simuluho mwa muhupulo wa Mulimu. Mwabona?

⁷² Mutualime kwa baprisita. Hane ba Mu boni inza iponahaza yena Muñi hande ka Linzwi, seo Nali sona, neba ize, “Ki Balezebubi.” Sani ne si bonisize kone ku inzi sibupeho sabona. Neli mwa muhupulo wa lizazi la kacenu.

⁷³ Kono fani lihule nyana, lani la Na katani fa munyako, ni ku mubulelala, na bonahalize sisupo sa Hae sa bumesia, ka ku mu bulelala sa na ezize. “Kiñi,” na ize, “Muñaka, Ni lemuha kuli U Mupolofita. Lwa ziba, Mesia, Ha ka taha, Uka lu bulelala lika ze kaufela.” Na Mu lemuhile kuba Mesia, yena Ya tozizwe, kakuli Na kopani ni linepo za Mañolo. Kana ha muboni nji? [Puteho ili, “Amen.”—Mu.] Liemba zepeli za mapampili ne litaha hamoho. Musali, “Lu ziba kuli, Mesia ha ka taha.”

⁷⁴ Cwale, Mulimu nana ni ku zwaka *se* ni *sani*, kuba ni mulumo nyana wa mulangu, sina sika sesi bola. Kono Jesu hana sikuluhile, ali, “Ki Na ya bulela ni wena,” neku sina sika sakuli “Balezebubi.” Musali asiya ndondo ya hae ya mezi, amatela mwa munzi, mi ali, “Amutahe, mutobona Muuna Ya ni bulelezi ze Ni ezize kaufela. Kana Yo haki yena Mesia luli?” Mwabona?

⁷⁵ Cwale, kiñi sene siezize se? Kubeya Mañolo akale ka zibo yeo—yeo Jesu nasweli ku mufa, kiñi sene i ezize? Ne itahisize Mesia. Mi kana mu lemuhile? Kapili, libi za hae neli swalezwi, kakuli, kwa simuluho, nali ya konahala ku liululwa, kakuli nali mwa munahano wa Mulimu kwa simuluho. Kacwalo, ne li mu liuluzi, kamba ku mu kutisa kwateni, fani hana boni Mañolo haiponahaza, ka Jehova, seo Nali sona, seo Ali sona.

⁷⁶ Cwale, fani Jesu hanatile, kambe Na tile ni liñusa la Nuwe, neli sike la beleka. Kuto yaha aleka, ni ku cimbauka, neli sike la beleka. Kono Nuwe yani nali kalulo ya Mulimu. Na ezize mwa mufuta o ipitezi kakuli nali ya ipitezi, mi liñusa la hae neli leli ipitezi kakuli neli Linzwi lene li iponahaza.

⁷⁷ Nasike ataha ni liñusa la Mushe, kakuli neli sike la beleka. Mushe nali Mulimu, mwa kalulo, yana iponahalize. Nali linzwi lene li iponahaza ka hola yani, kono Jesu nasike kutaha ka zani. Bibebe neisika bulela kuli Na ka taha ka nzila yani.

⁷⁸ Kono Yena hana tile, na bonahalize handende sina—sina Testamente hane i bulezzi kuli Na ka iponahaza cwalo, cwale bani kaufela bene bakona ku liululwa ba Li lumela, kakuli nebali milelo ya Mulimu. Minahano ya Hae kwa simuluho, neba ezizwe nama, ni ku liululwa, mi ba kutiswa hape ku Mulimu. “Bona baba Mu amuhezi, bona bao U bafile mata akuba bana ba Mulimu,” kakuli neba kona ku liululwa. Ne baliteni kuzwa kwa simuluho, mwa ponahazo.

⁷⁹ Hane luka yema fa ka nako nyana, haiba kwa konahala, ni ku nahana ka zeo, busihu bwa kacenu, ka za Liñusa la hola, mihupulo ye bonahalizwe ya Jehova. “Kusikaba kale mutomo wa lifasi,” lu bulelezwii kuli, “mabizo aluna na ñozwi mwa Buka ya Ngunnyana ya Bupilo.” Konakuli lwakona kubona liemba zepeli, sina hane Ni ize, libaka leo yomuñwi ali ya ipitezi ku yomuñwi. Ku lukela kuba cwalo. Nelli cwalo kamita. Kubile cwalo kamita, mi kamita ku ka banga cwalo. “Nali yena Linzwi. Mi Linzwi la ezwa nama mi la to yaha luna.”

⁸⁰ Cwale, Mulimu, mwa... kwani kwa mulaho mwa mazazi a Testamente ya Kale, lufumana kuli hasamulaho Amano iponahaza kwa sicaba sa Hae, mwa mifuta ye shutana, Na ipatile Iliyena kwa mulaho wa matalo a folofolo. Mulimu kui pata kwa mulaho wa matalo a folofolo, fa sipula sa Hae sa sishemo. Lufumana kuli, kamo kuli Solomoni, fani hana neile tempele ya Mulena, mi matalo a folofolo na nza lepelela, lisila, ka mwa Na tezi mwa Siita sa Mulilo mi sina Lilu, ni kuya kwa mulaho kwani, ni ku ipata Iliyena, kwa lifasi la kwande. Kono, ka tumelo, Isilaele na zibile kuli Naliteni kwa mulaho kwani. Ne ba zibile kuli Naliteni kwani, hakuna taba ka seo mafasi a bahedeni nabulezi. Na patilwe ku ya salumeli. Kono mulumeli, ka tumelo, Na liteni kwani. Neba nani sishemo. Mi Nali fa sipula sa Hae, yeneli kunutu ye tuna.

⁸¹ Mwa ziba, mwa Testamente ye Nca, kukena kwa mulaho wa litalo lani neli lifu. Cwale kuinela kwa buse bwa lona ki lifu. Mi kukena mwa Kanya ya Hae neli lifu. Cwale kuina kwahule ni Kanya ya Hae ki lifu. Sani ne si ezahalile, luli faa, fa kupazuha kwa lisila fa Kalvari, fani lisila hane li pazuhile, lisila la kale. Cwale kuina kwande a Pata ya Hae ki lifu. Mi kukena fa pila Pata ya Hae neli lifu. Mwabona? Za cinca kwa mulaho ni kwa pata, mi mulukela kufumana Mañolo fa kuziba lizazi le lupila ku lona.

⁸² Cwale, fani lisila hane li pazuhile fa Kalvari, sipula sa sishemo ne si tilo bonahala patalaza. (Kono kiñi sene si ezahalile? Neli ku lepelela fa Kalvari, kulota kwa Mali.) Hane ba zusize

mali, silimo mwa mulaho wa silimo, kwa kukeniswa kwa ndu ye kenile ni kufafalezwia kwa sipula sa Sishemo, kwani, Mulimu, ka mata a Hae amatuna a buhali sina lubya, na pazuzi lisila lani la kale la litalo kuzwa kwa halimu kuisa kwatasi, mi sipula sa Sishemo sato bonahala patalaza.

⁸³ Ngunyana ya niti, yona Luli ya Mulimu mwa ponahazo ya patalaza fa Kalvari, ona Sipula sa luli sa Sishemo, fani Mulimu hana lifile teko, Yena kasibili; ni kutoba alimuñwi wa luna, mi na iponahalize Iliyena ka kuba Mutu, ku to itwaeza ni luna, ni luna ku itwaeza ni Yena. Sipula sa Sishemo nesi bonahalile patalaza kwa Isilaele kaufela ka lizazi lani la Swalelo.

⁸⁴ Kono, kabumai, lizo za keleke ya bashem i mwa lizazi lani neli, ka lizo za bona, ne li patile Sipula sa Sishemo sa niti kuzwa kwa sicaba. Kambe ne ba zibile Mañolo, siemba kaufela ne si ka taha sina siemba sa lisila la mu Chinese. Sipolofita sa Testamente ya Kale ne si ka talelezwa, mi kwaba cwalo. Mi haiba ne ba lutilwe Mañolo, ne ba ka bona Sipula sa Sishemo. "Sina Mushe," iize fa, kuli, "kutofita ni lizazi le ba sa apesizwe. Ka sali fa lipilu zabona." Ha ba Li boni.

⁸⁵ Kono, Yena nali Mulimu, manyando ni Swalelo. Nali yena Sipula sa Sishemo sa niti sene siyemi ku iponahaza patalaza. Sina hane lu opelanga pina yetwi:

Mutalime, mu Mubone haiponahaza patalaza.
Ki Yani fale, yena Mutuli ya mata,
Kakuli U pazuzi lisila mwa liemba zepeli.

⁸⁶ Mwabona, Na tile, Sipula sa Sishemo, sinze si lepelela mwa ponahazo yeli patalaza mwa puteho. Kono bona, nebali mwatasa mulelo o zibahala . . .

⁸⁷ Cwale, baana ni basali, ni ba sephali bwa mukopano wo, Ni bata ku bulela se kusina ku kuteka mutu. Kono, mwa mubonelo wa kacenu, ka kutilima kwa lika zeo lubezi teni mo kacenu, Ni saba kuli lizo za bashem, bashem ba likeleke, ba patile Se kuzwa kwa batu babañata. Kuzwa fo Moya o Kenile utezi mwa mazazi a mafelelezo aa, sina haku polofitilwe, ni lisila lipazuzwi, batu babañata hahulu balika ku itingeta kwa lizo za bashem ba bona. Mi kona haba sa koni kubona nyakalalo yetuna ye, ni kozo, ni lika zeo Keleke inani kacenu. Ibo, Li mwa ponahazo yeli patalaza ku bani baba lumela.

Na patile Linzwi, ona Linzwi lene li sepizwe la lizazi le.

⁸⁸ Cwale, lizo li pangile lisila. Ba bulela kuli mazazi a limakazo afelile. Muuna yomuñwi naize kuna, mutanga yomunde, ya utehile hande mwanazwezi wa kwa Tucson, Arizona, ko Ni pila. Ne nibile ni mukopani kwa Ramada. Mi nelu sweli ku ambola kwa Mukopano wa Baana ba Pisinisi ili koo Mulena Jesu natile teni kuto eza lika zetuna. Mi mutangana yo wa Mukreste ataha ku na, mi ki hali . . . Mukutazi wa keleke, muuna yomunde, mi ki hali, "Muzwale Branham, ulika ku supeza batu kwa lusika

lwa ba apositola,” ki hali, “ibo kanti lusika lwa ba apositola lu felile.”

⁸⁹ Mi se Nili, “Na ku lapela, muzwale waka, ni bonise fone ku felezi lusika lwa ba apositola, mwa Mañolo.” Se nili, “Lusika lwa ba apositola nelu kalile ka Lizazi la Pentekota, mi lubile teni. . . Pitrosi naize, ka Lizazi la Pentekota, ‘Sepiso i ku mina, ni kwa bana ba mina, ni ku babali kwa hule, mane cwalo ni babañata be Mulena Mulimu wa luna uka biza.’ Ki lili fone lu felezi? Haiba Mulimu u sa biza, konakuli lusika lwa ba apositola lu sa li teni.”

⁹⁰ Mi kacwalo zani kona ze lika ku foufaza batu babañata, ka lizo za ba bahulu, sina mone kubezi kwani. Mi mupalelwu kubona libaka leo sicaba sibezi se si nyakalalile hahulu ni kutabela. Mi—mi mikopano ye ibile ye ipitezi hahulu, ki taba yenca luli, kwa batu babañwi, kakuli ba keni kupunya mwa li sitataliso. Ba keni kupunya mwahala masila ani, kukena fa pila Pata ya Mulimu, koba bona sepiso ye iponahaza ya hola ye ka ku iponahaza fapila sicaba. Ba bona seo Mulimu na sepi size.

⁹¹ Mwa Joele 2:28, Na sepi size, kuli, “Mwa mazazi a maungulo a kukaba pula ya mwa mulaho *yekanelo* ku suluhela fa sicaba, mwa mazazi a mafelelezo” Na sepa linzwi la si Gerike fani ki *kenos*, leli talusa kuli Na “ikusu falize” Iliyena. Isiñi ka nzila ye lu kona kubulela kuli, sina nto yeñwi hainzi mwahala yomuñwi, kulo mwa Na zwile teni. Kono, Na suluhezi fande Yena kasibili.

⁹² Na cincize; *en morphe* ya Hae. Na—Na cincize, kuzwa ku sa Nali sona, kutaha ku Sali sona. Yena hacincangi sibupeho sa Hae. Kono ka Lizazi la Pentekota, Na i cincize Iliyena kuzwa kwa kuba Mwana mutu, kuya kwa kuba Mwana Mulimu. Na tile, isiñi kuba *ni* batu. Natile *mwa* batu, mwabona, yena Mulimu yaswana, ili kuzwisezapili bulumiwa bwa Hae, mwa lusika tuna lo.

⁹³ Na polofitile mwa Bibele, kuli, “Kuka taha lizazi leli sike kuba musihali kamba busihu, kono mwa nako ya manzibwana kukaba Liseli.” Cwale, lizazi, leli bonahala, li pazulelanga kwa upa ni ku likelela kwa wiko. Ki lizazi leli swana, nako kaufela. Cwale, fani, Mwana, M-w-a-n-a, hana i patuluzi Iliyena mwa ponahazo ya Linzwi leli sepi size, kwa Isilaele, batu ba kwa Upa.

⁹⁴ Lubile ni lizazi leli sabisa. Lubile ni liseli leli ñata mwahala baongaongi, ni babañwi cwalo, kwa kupanga likeleke ni likopano, ni kuikenya kuzona ni kutaha mwateni; ni kutubeta limbututu, ni kunyalisa baba hulile, ni kupumbeka bafu, ni zeñwi cwalo; ni kupila mwa keleke.

⁹⁵ Kono, mwa nako ya manzibwana, “Kukaba Liseli,” Na ize, “mwa nako ya manzibwana.” Mi hakuna Liñolo leli lukela ku lobiwa. Mi yena M-w-a-n-a yaswana yani na suluhile Iliyena, *kenos*, ka Lizazi la Pentekota, usepisize kueza taba yeswana mwa nako ya manzibwana. Mwabona? Ki kuya ka sepi so.

⁹⁶ Mubeye tusila hamoho. Mutualime se si sweli ku ezahala, mi mutualime sa Na sepisize, mi mu ka bona fo lu inzi. Mubeye lika hamoho. Mwa kona kubona kupatuluha kwa muambakani ya pahami Yo. Lizo li foufalize batu, hape, kwa lika zetuna ze sepisizwe ze.

⁹⁷ Mushe, hana inza shetumuka kuzwa fa lilundu, lene lituka Mulilo, ki pono mañi kwa bunde!

⁹⁸ Mushe naile kwani kwa Egepita kuyo bulelela bashemi ba likeleke kuli Mulena Mulimu na mu potezi ka Libizo la kuli “YALITENI.” Libizo lani ki tensi ya cwale; isiñi “Ne ni liteni; nikaba teni.” Kono, “YALITENI,” kamita wa swana, yaswana maabani, kacenu, ni kuyakuile. Yena ki tensi ya cwale. Yena... Sani sibapiswa kwa Maheberu 13:8, “Jesu Kreste yaswana maabani, kacenu, ni kuyakuile.”

⁹⁹ Isali Linzwi leli polofitilwe. Mi, puteho, yene lukela ku lumelelana ni Linzwi lani, zibo ya lizazi le. Baongaongi neba bile ni yona, oh, kono le ki lizazi lisili. Mwabona lizazi le lupila ku lona. Sina fela Ha na sike kutaha, mwa mazazi ami ha Na tile mwa lifasi, mwa—mwa nzila yeo Mushe natile ka yona, kamba yomuñwi kaufela wa bapolofita ya natile ka yona; neisika polofitwa. Mi mwa lizazi la maungulo le, ku polofitilwe kuli kutaha ka nzila ye. Haku konahali kutaha ka mukwa wa ancafazo ya Luther. Haku konahali kutaha ka mukwa wa ancafazo ya Wesley. Ki hola ya ku kutisa. Seli nako yakuli likute kwa Liseli la Mwana la makalelo, lona la pili.

¹⁰⁰ Oh, kamo lukona kubeya Mañolo mwani, ku sani! Mi mina baituti ba tumelo ya bumulimu, ki lifasi leli cwani ko muzwelela, muziba kuli Yani ki niti. Ki sepiso. Sani kona sesi eza batu kuba baba shutana. Sani kona sesi panga buipiteli, mo mu li bizeza. Ki kuli bona ba...ki...Lisila li kwaluhile, kuzwa kwa lizo, mi ba Li bona. Ki yaswana maabani, kacenu, ni kuyakuile. Mwabona? Ki yona—ki yona sepiso ya Mulimu, mi halukoni ku hanyeza sani, kakuli Mañolo hakoni ku lobeha. Eeni. Lufumana kuli Na sepisize sani. Na ikusufulize ni kuikenya Iliyena mwa sicaba sa Hae. Mi Yena ki yaswana maabani, kacenu, ni kuyakuile.

¹⁰¹ Mushe, kasamulaho amano ya mwa Egepita ni kuyo zibahaza se, Ndate ki ha yemela liñusa la hae, ka kutaha fa Lilundu la Sinai, mwa Siita sa Mulilo sesiswana, ni ku tukisa Mulilo fa lilundu. Kana lu lemuhile? Bona ba Na file sepiso ku bona, Na mu tisize hamoho ni Linzwi. Na nani litaelo. Mi kuba ni taelo ye, na nani...Litaelo neli Linzwi. Linzwi neli sika taha kale kwa sicaba. Kacwalo, Linzwi kamita litahanga ku mupolofita, mi yena nali mupolofita wa hola yani.

¹⁰² Sina, Jesu hanali Linzwi. Joani nali mupolofita. Mi Jesu natile ku yena, mwa mezi, kakuli Linzwi kamita litahanga ku mupolofita, kusina kupalelwa. Mwabona? Linzwi litahanga ku yena.

¹⁰³ Kacwalo, Mushe, Linzwi nelitile ku yena, litaelo. Mi nabile ni zona. Cwale, kiñi? Fani Linzwi hane lifilwe ni ku iponahaza, Mushe na patile sifateho sa hae, kakuli Linzwi nelisika bonahala kale ka ku talelela. Neba zibile kuli sesiñwi nesi ezahalile, kono neba sa zibi ko ne i fumaneha, mishika ni kuluma. Kufitela, babulela kuli, “Mutuhele Mushe abulele, mi isi Mulimu.”

¹⁰⁴ Mi Mulimu ali, “Kulukile, Nika eza cwalo. Kuzwa fa kuya kwapili, ha Ni sa iponahaza sina cwana ni kamuta. Ni ka ba lumela mupolofita. Kacwalo uka . . . Ni ka bulela ka kufitela mwa bapolofita ba Ka.”

¹⁰⁵ Cwale, haiba Mushe, ka mulao wa butu, (sina Paulusi, mwa Makorinte ba Bubeli mo, upatuluzi ku luna), na apesize sifateho sa hae ka butu, kana za Moya likaba cwani ki kanya linze lipatilwe ku ya sa lumeli ni ku patululwa ku yena! Kana neba ka biza cwani . . . Mushe nali ya ipitezi. Kana baka mi biza cwani mina, baba keni kupunya mwa lisila, mina baba ile mwa Siita sa Mulilo, baba zwile ka Mbuyoti! Mi cwale mu patilwe. Batu habakoni ku li bona. Haba koni ku Li utwisisa.

¹⁰⁶ “Haiba za butu liba ze kanya, kukaba cwani he ku za moya! Haiba za butu, ze ne nani mafelelezo ku zona, ne li na ni kanya, kana kucwañi he ku Ze sina mafelelezo, ikaba ze kanya!”

¹⁰⁷ Kono, niteni, Li patilwe. Ha li si ka patiwa ku ya lumela, kono ki kuya sa lumeli. Ha koni ku Li bona. Mulimu kamita wa ipatanga Iliyena ku ya sa lumeli. Lizo li Li patile. Sina mone ba ezelize kwani, baeza cwalo ni kacenu.

¹⁰⁸ Lani neli lisila la moya lelu nani cwale, kone kuna ni lisila la butu. Ba pakilwe ka mupolofita nika Linzwi leli ñozwi, mu polofita, yena ya natile ni Linzwi leli ñozwi, ku Li eza patalaza.

¹⁰⁹ Neba zibile kuli Linzwi neli liteni fani, kono ne ba sa zibi seo ne Li talusa. Mi Mushe a Li bonahalisa patalaza. Na ize, “Mulao ubulela *Cwana*, mi *le* kona libaka.” Na li zibahalisize ku lipatalalisa. Mi Li sika eziwa kale kuba patalaza, Ne li patilwe.

¹¹⁰ Mi kona mo kusa inezi, ni kacenu, li patilwe kwa batu, kufitela ha Li ka patululwa ni kutiswa fa ngandaleza. Mulimu, yena Mulimu ya mata, na ipatile mwa nama ya butu, ona Linzwi. Mulemuhe. Cwale lufumana kuli neli patilwe ku ya salumeli, kono neli patuluzwi ku mulumeli.

¹¹¹ Mulemuhe, Mushe nabile ni kukena mwa Siita sa Mulilo, anosi. Neku sina yana ka ya ni yena. Neku sina . . . neli . . . Sani sitalusa sikamañi ku luna? Kikuli ha mukeni mwahali Mo ka kuikopanya kwa sikhata sa Pentekota. Mwabona? Na si ka Li patululela kwa sikhata. Na Li patululezi ku mutu alimuñwi. Mi cwalo kona mo kuinezi ni kacenu. Mu li, “Ni wa siemba sa—sa keleke. Ni—Ni wa neku *le*.” Kono sani hasina kubeleka. Mwabona?

¹¹² Mi kuli yomuñwi alike ku latelela Mushe, ku likanyisa, neli lifu. Mi kucwalo ni kacenu, lifu la moya, kulika ku likanyisa. Sani kona sene . . .

¹¹³ Busihu bwa kacenu, lu kena mwa, kuna ni yaka yema mwahala likwata, ku bapisa kwa butu; yomuñwi ulika kueza sina Lona, ni kupila bupilo bo bu shutana; wakona kunwa, wakona kuzuba, basali bapila ka mikwa kaufela . . . ka nzila kaufela yeba bata kupila kayona, mane sina lifasi, mi baina kwa ndu ni kubuha televishini, ni lika za lifasi, mi banze baipiza kuli ki Mapentekota. Balika ku likanyisa sika sa niti. Ha li sika patululwa kubona, kale. Ha Li ka patululwa, kile likanya, mi sesiñwi si zusa sani ku mina ha mu kena mwahali Mwani. Mu fetuha lisila. Ki . . . Lona halina kubeleka. Mi ku Li likanyisa neli lifu.

¹¹⁴ Lisila la Mushe; nali Linzwi leli pila kwa sicaba. Mi kacenu, sicaba sesi i kapesize ki taba yeswana. "Ki mañolo a ñozwi, abalwa ki batu kamukana." Isiñi linolo *lelinca*; kono ki Liñolo leli ñozwi, leli iponahaza. Ki—ki bani baba lumela Linzwi ni sepiso ya lizazi le, bao Mulimu a sululela Moya wa Hae, fahalimwa nama kaufela, mi ani ki mañolo añozwi. Mi cwale mutu halika ku likanyisa sani ka butu fela, sa fosahala. Bupilo bwa hao bu bonisa soli sona.

¹¹⁵ Nako yeñwi neku na ni mushimani, na keni mwa butata. Nali mushimani yomunde, kono na—na ile kwa kuta. Mi muatuli sali, "Ni ku fumani ni mulatu. Ni lukela kukufa mulatu wa kupila mwa tolongo."

¹¹⁶ Ki hali, "Ni bata kulika taba yaka." Ki hali, "Ni bata kuya ka pihoh yaka."

¹¹⁷ Mi ali, "Hauna niheba pihoh. Pihoh ya hao kona ye ku atuzi."

¹¹⁸ Mi cwalo kona mo ku inezi kacenu, libaka leo keleke haizwelipili ka mo ilukela kubela. Ki pihoh. Ki bupilo. Lu swanela kuba baba ipeile hahulu. Lu swanela ku lumela Linzwi la Mulimu kaufela. Lu swanela kubata kufitela Linzwi lani liba la niti ku luna. Mwabona? Mwabona? Pihoh kona ye lu paleliswa kukena.

¹¹⁹ Kono, nako yeñwi, (kuli mukone kuzwa mwa sikwenda se), mwahala ona kuta yeswana ye, mushimani nasina masheleni. Na sa koni ku itifela. Mulatu nolikana madollar aeza likiti kit. Kono nana ni muhulwana hae wa muuna yana tilo mu lifela.

¹²⁰ Cwale, luna ni muhulwana luna wa Muzwale, Jesu, Mwana Mulimu. Mi Na tilo lu lifela, haiba lukona fela kulumela ni kukena mwa lisila ni Yena. Sina, ki Yena Mushe wa luna. Jesu ki Mushe wa luna wa kacenu. Mushe, lisila, nali Linzwi leli pila kwa batu. Kacenu, Jesu, ya patilwe, ki yena Linzwi leli pila kwa batu, yani, Jesu mwa Keleke. Moya o Kenile, Mwana Mulimu mwa batu, inza patulula Linzwi ka sepiso ya lizazi le, u Li eza kuba ona cwalo. Leli swana cwale.

¹²¹ Mi muhupule, Mushe naeziye cwalo, ni ku bonahalisa se, isi kwa lifasi kaufela, kono kwa sicaba sene situta mwa exoda, sikwata fela silisiñwi sa batu, bani ki bene bazwile mwa exo- . . . mwa kututa kwa exoda.

¹²² Mi kacenu, Moya o Kenile, mwa lipata za batu baba bulela kuli, "Foliso ya bumulimu hai sika luka." Hane Ni batisisa . . .

¹²³ Mualafi na ni bizize, zazi leliñwi, ka musizana yomunyinyani, oh, nekubile litaba zene kamba ze ketalizoho kwani, zene libelezi fela kalulo ya lifu, kutoma lihola, mi Moya o Kenile wa ba folisa. Mualafi nanza buza ka zona. Ki hali, "Taba ye ikona kuba cwani? Kiñi," ki ali, "Ni—Ni . . . Yani ki mukuli waka."

¹²⁴ Se nili, "Neli yena. Kono cwale neseli wa Mulimu. Ki—ki, mutu wa Hae cwale." Mwabona?

¹²⁵ Mi kacwalo mwa bona taba yateni, kuli Mulimu uswel i kubiza kututa kwa exoda, kuzwa mwa lisila la nama leli lika ku likanyisa, baba lika kuikopanya mwa keleke; isiñi mwa Methodist, Baptist, Presbyterian, kaufela, kono likeleke za Pentekota. Ki ndwa ya mutu anosi. Ki wena ni Mulimu wa hao. Ulukela kukena teñi, isiñi sikwata sa hao, isiñi keleke ya hao, isiñi mulisana wa hao, kono ki wena ya lukela kukena mwateni.

¹²⁶ Ni bata kuli mulemuhe buino bobuñwi hape bwa Mushe, fani hana tile. Mbo, nali mupolofita, kakuba muuna yomutuna ka mwa nabezi, hana tile ni Linzwi, sicaba ne si boni kuli na cincizwe. Sesiñwi ne si ezahalile ku yena. Fani hana zwezi kwande ni Linzwi le li pakilwe la hola yani, milao, nabile mutu ya cincizwe.

¹²⁷ Mi cwalo kona mo mu kabela ni mina, hamu ka zwa mwa lisila la butu leli kona kuseha mukopano oswana sina wo; muuna yani yana ka sitatala ka foliso ya Bumulimu, ni kubulela kuli mazazi a limakazo a felile. Mu se muwile kuzwa mwa lisila la butu lani kwani, lisila la sizo, mi mutu kaufela uka ziba kuli sesiñwi si ezahalile ku mina.

¹²⁸ Sina muzwale waluna ya kutekeha muzwale, Jim Brown. Ni nahana kuli buñata bwa ma Presbyterian baziba kuli sesiñwi si ezahalile ku yena, kakuli u—u zwile kwa mulaho wa lisila la sizo. Na boni sesiñwi mwa sicaba, sene si mu hohile, mi ki ha taha kuzwa kwa mulaho wa lisila.

¹²⁹ Kulukile, mina, hamu taha kuzwa kwa mulaho wa lisila, muka bonwa hande kakutala ku ba bañata, kuli bakona kubona kuli sika sesiñwi si ezahalile ku mina. Linzwi le li patilwe, kuya sa lumeli, kono mwa ponahazo yetezi ku mulumeli. "Jesu Kreste ki yaswana maabani, kacenu, ni kuyakuile."

¹³⁰ Kutuhafo, neli Mulimu. Mwa mazazi ani, neli Mulimu ku Mutu, Mwana Hae, Jesu Kreste. Lwa lumela cwalo. Nesi fela mupolofita, isiñi mutu wa fela fela, butu bwa fela fela. Neli

Mulimu ku Kreste; Mulimu mwahala Mutu; mutalelela wa Bumulimu, ka mubili ku Mutu. Mulimu mwahala Mutu!

¹³¹ Cwale ki Mulimu mwahala batu, mutalelela wa Mulimu mwa toho ya Bumulimu, ka mubili mwa Keleke ya Hae kakutala, inza iponahaza Iliyena, inza taleleza Linzwi la Hae.

¹³² Cwale lufumana kuli, Mulimu, mwa masika kaufela, ubile A apalanga mwa litalo. Yena, Mulimu, ubile aipatile kwa mulaho wa lisila.

¹³³ Si ni hupulisa fela kaza—kaza likande leli nyinyani lene li ezahalile kwani kwa Mboela. Mi kacwalo ne ku nani lapa la Sikreste. Mi cwale mwahala lapa la Sikreste le neba lumela ku Mulimu, mi ba—ba hupula kuli—kuli Mulimu naba sileleza kwa matata kaufela. Mi, nifo, Wa ezanga. Mi neba nani Junior yomunyinyani, mwendi wa lilimo ze supile kamba ze ketalizoho za kupepwa. Mi—mi na yanga kwa sikolo sa Lasunda mi nali mushimani yomunde hahulu. Kono na saba mwa liñungwa hahulu, sihulu hane ku benya lumonyi.

¹³⁴ Mi Na bulelela muuna yo, zazi leliñwi, siemba se hane sitile kuli mutu yo nasafolile. Mukutazi yaswana yo ali, “Ba kueza kuba kalimu, Muzwale Branham.”

¹³⁵ Kulukile, nali muhanyezi, kacwalo Na hupula fela kuli Ni ka li lyanganisa fela, fa nako nyana fela. Isiñi ku halifisa, mwa ziba, kono ka bunolo fela... Se nili, “Kana sani si kwahule hahulu ni Mañolo, kuba cwalo?” Mwabona? Se nili, “Batili, batili haku cwalo,” Se nili, “kakuli Jesu nabizize bapolofita kuli ‘balimu.’ Mwabona? Yani ki niti, ‘Mulimu.’”

¹³⁶ Mi bali, “Kulukile, mina sicaba mulika kunga sibaka sa Mulimu.” Sani ha ki sika sa kwahule hahulu. Sani kona mo si inezi luli. Kona cwalo. Mulimu na bonahalile mwa nama, kuya ka mwa Na sepiselize.

¹³⁷ Lubasi lolu nyinyani lo, lufumana cwana. Ne ni mu bulelezi likande leli nyinyani le, lelitile mwa munahano waka cwale. Kuli, busihu bobuñwi ne kutile liñungwa, mi bo mahe bali ku Junior, bali, “Cwale, uye u pahame fahalimu, mwanaka, mi uye u yo lobala.”

Ali, “Ima, Na saba,” a bulela.

“Hakuna se si ka ku holofaza. Zamaya u pahame uyo lobala.”

¹³⁸ Junior yomunyinyani alobala fahalimu fani, mi mamonyi inza monyeha mwa mahaulo. Mi mushimani yomunyinyani aikalelwahahulu, na pata toho ya hae mwa kubo, kono ni cwalo na sa utwa ona—ona mamonyi, kamba kubona mamonyi a bonahalela mwa mahaulo, mi—mi autwa mishika ha i luma. Kacwalo ali, “Ima!”

Mi ki hali, “Kiñi so bata, Junior?”

Ali, “Taha kwanu uto lobala ni na.”

¹³⁹ Kacwalo ataha ku pahama fahalimu, sina ka bunde kaufela, bo me ya lilato akona kueza. Mi ni yena ataha, mi kiha nanula Junior yomunyinyani mwa mazoho ahae mwa mazoho. Mi ki hali, “Junior, boma balata kubulela ni wena fa nako nyana.”

Ali, “Ki hande, ima.”

¹⁴⁰ Ali, “Cwale mulukela kuba ni se mwa minahano. Lwa yanga kwa keleke, ka tundamo. Lwa balanga Bibele. Lwa lapelanga. Luna lu lubasi lwa Sikreste. Lwa lumela ku Mulimu.” Mi ali, “Lwa lumela ni, mwa mañungwa ni lika kaufela ze ezahala, Mulimu kiyena silelezo yaluna.”

¹⁴¹ Sa li, “Ima, Na lumela siemba sa teni kaufela. Kono,” ali, “lumonyi lwani haluli fa kaufi hahulu,” ki hali, “Ni—Ni bata Mulimu yana ni litalo ku Yena.”

¹⁴² Kacwalo, Na—Na sepa, isiñi fela Junior, kono kaufela luna lu ikutwa cwalo. Ha lu ba hamoho, halu lapelelana yomuñwi ni yomuñwi, Mulimu yana ni litalo ku Yena.

¹⁴³ Mi lufumana cwana fa kuli Mulimu ubile ni litalo ku Yena. Fani Mushe hana Mu boni, Na nani litalo ku Yena, ku bonahala sina Mutu. Fani Mulimu hanali kwa mulaho wa masila, Na nani litalo ku Yena. Mi Mulimu, busihu bwa kacenu, mwa Keleke ya Hae, u ipatile mwa Keleke ya Hae inza apezi litalo ni Yena. Yena usali Mulimu yaswana, busihu bwa kacenu. Lufumana cwalo.

¹⁴⁴ Kono cwale, sina kamita, siapalo sa litalo kona sesi lamatela kwa lizo. Habakoni fela kulumela kuli yani ki Mulimu yaeza kuli batu bani baeze cwalo. Mwabona? Ki kuli Mulimu upatilwe mwa Keleke ya Hae, mwa litalo, inza nani litalo ku Yena. Yani ki niti. Yena upatilwe ku ya sa lumeli, mi upatuluhile ku mulumeli. Eeni, sha.

¹⁴⁵ Cwale, lisila labona la sizo, ka lizo za babahulu ba Linzwi, kona mo li fumaneha, oh, fa luli, kacenu, kona litaha mwa ponahazo yeli patalaza, lwa Mu bona, Bumulimu hape ha bu iponahaza mwa nama ya butu. Maheberu 1 ibulezi cwalo.

¹⁴⁶ Mi hape Genese 18. Muhupule, Mulimu nali Mutu, ya yemi fani, naca, ni ku ambola ni Abraham, ni kubulela seo Sarah nasweli kueza mwa tende kwa mulaho a Hae.

¹⁴⁷ Mi Jesu naize, “Sina mone kuinezi mwa mazazi a Sodoma, ona cwalo kona mo ku kabela kwa Kutaha kwa Mwana mutu.” Bumulimu bu patilwe hape mwa nama ya butu! Cwale, muhupule, Jesu nasika li, “Foo Mwana Mulimu ha ka patululwa.” Mwa Lukas kauhanyo ya 17, Na lumela, mi ku yofita fa timana ya 20, niya 21, fokuñwi mwahali mwani, Na ize, “Mi cwale ki fo Mwana mutu ha patuluha.” Mwana mutu, kwani mwa—mwa—mwa Keleke hape, na patuluhile mwa nama ya butu; isiñi Mwana Mulimu, kono Mwana mutu hape, kukutela mwa Keleke ya Hae

hape, mwa mazazi a mafelelezo. Lufumana kuli Na sepisize sani mwa lisepiso za Mulimu.

¹⁴⁸ Lu lemuha taba yeñwi, mwa Testamente ya Kale. Ni na ni Mañolo fa, mwa Exoda. Kuli, matalo akale a folofolo, ki sikamañi sa na ezize? Na patile Kanya ya Mulimu kuzwa kwa sicaba. Matalo a lifolofolo; niheba batu neba sika I bona, kakuli neli litalo lene li Li apesize. Litalo neli... Kanya ya Mulimu neili kwa mulaho wa litalo.

¹⁴⁹ Mi cwale Kanya ya Mulimu ikwa mulaho wa litalo la mina. Yani ki niti. Mi lizo ha I boni. Inzi kwa mwahala lisila, koo Linzwi la Hae neli fumaneha.

¹⁵⁰ Ki sikamañi sene sili kwande a litalo lani kwani, matalo a kale a lifolofolo?

¹⁵¹ Ili fo, “Ne kusina bunde kuli lu Mu tabele. Mi hane I ezizwe nama ni kupila mwahala luna, Niteni nekusina bunde kuli lu Mu lakaze.”

¹⁵² Mi cwale taba yeswana iteni ni kacenu. Hakuna sina ku muuna kamba ku musali, se sikona ku lakazeha. Kono ki sesili kwa mulaho kwani. Sani kona seo sili sona. “Kulukile,” mu li, “mutu yani, Na ziba yani nabanga cakolwa. Na ezanga sa *kuli*.” Hanina taba ka za na ezanga. Kiñi sikamañi se si patilwe kwa mulaho wa litalo lani? Kiñi sesili kwa mulaho kwani, sani kona sesili butokwa. Sani kona, sicaba si foufalizwe. Litalo la foufaza batu. Mwabona? Ba li, “Na hupula fani musali yani hana li cwalo.” Na ziba sana banga sona, kono kucwañi he ka cwale? Mwabona?

¹⁵³ Matalo ani, sani neli ka nako yeñwi fa litalo la folofolo, kono cwale si patile Kanya ya Mulimu, li I patile kwa mulaho wa lona. Nelili fa folofolo, kono cwale li beilwe mwa ndu ya Kanya ya Mulimu.

¹⁵⁴ Mi cwalo ni litalo la mina lakona ku cinciwia, busihu bwa kacenu, kupangiwa ndu ya sibaka sa Mulimu, Mulimu kupila mwahala libupiwa za butu.

¹⁵⁵ Mutualime. Matalo akale a lifolofolo, lufumana kuli, mwa mulaho aona nekuna ni... Mwahali mwani nekuna ni Linzwi. Mi, Linzwi, nekuna ni sinkwa sene ibeiwanga mwa tabernakele. Aleka neifafalezwa. Mi neli sikamañi sani? Kanya yeipitezi ya Shekinah neili mwani.

¹⁵⁶ Cwale, Linzwi ki Peu, mi ha Li koni kumela konji Musali pili-... pili Mwana amonyehe Fatene. Mwana ulukela kuba fahalimwa Peu, kuli Ikone ku beya, kuli Ikone kumela. Mi yani kona inosi. Munge Linzwi, mwabona, munge Linzwi la Mulimu mwa lipilu zamina, mi mukene mwa Kanya yeipitezi ya Shekinah. Mi hamu kaeza cwalo, Ikatisa sinkwa sa mwa tabernakele, Maana, zeo lifiwa fela kwa sicaba sesi shutana. Taba inosi fela yekona ku ica, ki baba lukiselizwe ku ica, ki batu

baba lumelelizwe fela mi baba I ziba. Paulusi naize fa, “Kucinca kuzwa kwa Kanya kuya kwa Kanya.” Mwa bona, ka kufeleleza, Sitaha mane kufitela Si kuta fa makalelo a Kanya ya Sona.

¹⁵⁷ Ki nto yeswana fela sina peu ya kanya ya kakusasana. Peu ya palisa, iwela mwa mubu. Peu ya mbonyi iwela mwa mubu. Taba yapili kiñi? Ya mela, mi iba simela sesinyinyani. Mi iya fa sibunga. Mi, kuzwa mwa sibunga, i kutela kwa bubeke bwa makalelo hape.

¹⁵⁸ Kulukile, sani kona seo Keleke i ezize. Izwile ku Luther, Wesley, mi fa i kutezi kwa Bubeke bwa makalelo, kukutela kwa Kanya ya Yona ya pili, kukutela kwa Kanya kone Ibanga kwa simuluho. Mwana yana pazuzi kwa Upa, ki yena Mwana yaswana yasweli ku bonahaza taba yeswana kwa Wiko, kucinca kuzwa mwa Kanya kuya kwa Kanya. Nei cincize kuzwa kwa buhedeni, kuya ku Luther; mi kuzwa ku Luther, kutaha ku Wesley; kuzwa ku Wesley, kuya kwa Pentekota; ni kuya cwalo cwalo, kucinca kuzwa mwa Kanya kuya kwa Kanya, kutahisa Maana ye patilwe.

¹⁵⁹ Mi cwale I buzwize, ku Mutisa hape sina mwa Na inezi kwa simuluho, bulumiwa bwa Hae bo buswana; yena Jesu yaswana, ona mata aswana, ona Moya o Kenile oswana. Yena ya Na shetumukile ka Lizazi la Pentekota, ki yena Moya o Kenile oswana oiponahalize kacenu, kuzwa kwa Kanya kuisa kwa Kanya, kuya kwa Kanya. Mi li kutezi kwa sibaka sa Lona sa Peu, ka kolobezo ya Moya o Kenile; ka lisupo ze swana, limakazo ze swana, kolobezo yeswana; mufuta oswana wa batu, kueza lika ka nzila yeswana, ka mata aswana, maikuto aswana. Ki kuzwa kwa Kanya kuya kwa Kanya. Mi sesi tatama ikaba, “Kucinca kuzwa kwa Kanya ye, kukena wa mibili oswana sina wa Hae Luli o kanya, ko luka Mu bona.” Abrahama naboni ze swana.

¹⁶⁰ Cwale mulemuhe. Lwa bona mo ne ku cincelizwe. Kuzwa kwa Kalvari, lu memiwa kuli lu ikabele Kanya ya Hae. Cwale, mwa Makorinte Bapili 12, “Lu kolobelizwe mwa Mubili wa Hae. Luna kaufela lu kolobezwa ka Moya ulimuñwi.” Isiñi ka “mezi” alimuñwi. “Moya Ulimuñwi, luna kaufela lu kolobelizwe.” Yani ki niti, cwale, mi cwale lu ba siemba sa Hae.

¹⁶¹ Na sepa ha Ni inisi nako yeteletele hahulu. [Puteho ili, “Batili.”—Mu.] Mwabona? Na sepa ha Ni mi liehisi.

¹⁶² Kono, kuswana fela sina siñwañwa sesituna sesi sweli kuliziwa, kamba kueza papali.

¹⁶³ Hani zibi hahulu kaza liñwañwa kamba lipapali. Kono Ne nisweli kubuha papali ye... Ne ni ambola kaza *Carmen*, fani mwanaka wa musizana ni babañwi hane bali ku yona. Mi neba—mi neba sweli kuliza siñwañwa se, mwa *Carmen*. Neba sweli kueza papali. Lipina neli—neli—neli utwahala ka mukwa oswana.

¹⁶⁴ Cwalo kona mo kuinezi ha ukolobelizwe ka Moya o Kenile, ku Kreste.

¹⁶⁵ Cwale, mwabona, buñata bwa mina mubalile kamba kuutwa likande la muloki yomutuna wa mu Russian yana opezi kuli *Pitrosi Ni Sitongwani*. Ni ka mo, neba lizelize zani fa singubu ni zeñwi. Mi mutu kaufela ya ziba likande, ya libalile mwa mutende, mi autwe siñwañwa sani, mo i utwahela kwani, yona papali, ha ibapalwa, kiñi, baziba cinceho kaufela. Bakona ku i talima *kwanu*, ni kubona cinceho.

¹⁶⁶ Kono, cwale, kiñi sesi ezahala haiba—haiba muloki uñola taba isili, mi lufumana kuli hai sika bapalwa hande ka swanelo? Lufumana kuli kuna ni sesiñwi se si ka ezahala. Kuna ni sesi tondahala, ha lu li bona. Yana ya na ilokile u iezize ni ku iñola, mi cwale sikwata sa babapali bailiza, hai nata fa mulumo wa mutengu. Kuna ni sesi fosahalile. Kona kuli muzamaisi nafile muzamao ofosahalile. Mwabona?

¹⁶⁷ Mi bwani kona butata kacenu, mizwale baka ba Lutheran, mizwale baka ba Baptist, mizwale baka ba Pentekota. Mizwale baka kaufela kuzwa likopano ze shutana, sani kona seo sili sona. Mwabona? Mulika kufa muopelelo onoli wa mazazi akale ku Luther, Wesley, sina cwalo, fani haneli, kaniti, Pampili ya lipina fa i bonisa kuli ki lizazi lisili. Mwabona? Mwabona? Mwabona? Halukoni kupila mwa liseli la Luther; nali muongaongi. Lwa itumela siemba sa—sa hae, kono yani lu i lizize kale. Fa selu inzi *kwanu* kwa mulaho wa Buka cwale. Mwabona? Halukoni ku—halukoni ku I liza sina cwalo.

¹⁶⁸ Cwale, nzila fela yemuka kona kueza ka yona, mizwale yaka, ki cwana. Ni mizwale ba mwa lifasi, babali mwa libaka ze shutana za lifasi, Na kona kubulela, kuna ni fela nzila iliñwi yeo—kuli muzamaisi yani alukela kueza. Una ni kukena mwa Moya o swana o muñoli wa pina nali kuona, konakuli ukaba ni Ona. Mi cwale Keleke, sikwata sa baopeli ba siñwañwa Sona luli, fo lifasi halinze libona lisupo ze ni limakazo; fo Keleke, ni Muñoli wa pina, ni muzamaisi, kaufela bakena mwa Moya wa Muñoli.

¹⁶⁹ Konakuli haba kali, “Mazazi a limakazo afelile,” halina kunata fa mulumo omunde.

¹⁷⁰ Kono hai kena mwa kopelo yende ya Teni, ni Moya o monde wa Yona; muka eza cwani kufitela Moya u shetumuka, wa Muñoli? Amen. Konakuli mu kali, “Mazazi a limakazo hasika fela,” sikwata sa ba bapali ba siñwañwa sili, “Amen!” Haluka nata cwana, kuli, “Jesu Kreste yaswana maabani, kacenu, ni kuyakuile,” sikwata sa ba bapali ba siñwañwa sili, “Amen!” “Muka amuhela mata kasamulaho Moya o Kenile ha usotile ku mina.” Sikwata sa ba bapali ba siñwañwa sili, “Amen! Ni na ni Sona!” Hakuna mukwa wa kunuha ka zona he. Sikwata kaufela sa zamaelela ka swanelo ni Linzwi. Sa ya . . . [Muzwale Branham ukambela mazoho a hae hamoho halalu—Mu.] Kona cwalo. Oh!

Ki taba ye katulusa. Muzamaisi ni Muñoli balukela kuba Moya o swana. Mi cwalo kona moba lukela kubela ni bona baopeli mwa Moya oswana, ku Li eza hande. Mi lifasi la komoka sesi sweli ku ezahala.

¹⁷¹ Swalisano yeba bulela ka yona, ni ku ni kulisa ka zona, ni li zwakisa le ni lika zeñwi kaufela, ni ketululo. Oh, sishemo! Kulí, ona bukuba bo kaufela, fo Kutaha kwa Mulena ku nze ku sutelezi fakaufi, kuna ni sesi nata ka mafosisa. Ni saba kuli muzamaisi uka... Bazamaisi ba se ba zwile mwa Moya wa Muñoli wa pina.

¹⁷² Halunga Moya wa Muñoli yani, ona mata a Mulimu apili ani one ibulezi Bibele kuli, "Baana bakale neba zamaisizwe ka Moya o Kenile fa kuñola Bibele," muka bona mapampili amabeli ani ama Chinese kutaha hamoho, sina fela Bibele ya Mulimu ni mulumeli halika taha hamoho, kakuli sibeli za zona li inzi mwa Moya oswana. Sibeli sa zona ki lika ze swana. Za lumeliana ku libana hande hamoho. Se lutokwa kacenu ki bazamaisi, babali hande, baba kutela kwa Linzwi, baba kutela ni ku Li lumela kuya ka mo Li bulelezi. Konakuli muka bona Mulimu, Yena luli. Kwani kona kupatuluha. Papali i tisizwe patalaza.

¹⁷³ Kacenu, babulela kuli, "Kulukile, Yena ki Mulimu wa baikale. Lwa ziba kuli Na silile Liwate Lelifubelu. Na ezize ze kaufela. Mi Nali mwa—mwa ondo ya mulilo osabisa, ni bana ba Siheberu." Bunde bwa Mulimu wa baikale ki bufi, haki, haiba Ha ki yaswana ni kacenu? Mutu kamita unyakalalisanga Mulimu ka Sa kile aeza, ku nahana sa Ka eza, ni ku libala Sa sweli kueza. Kucwalo ku mutu ku ezanga cwalo. Mi ki taba yeswana kacenu, bana bahesu. Ki taba yeswana luli. Oh, mawi!

¹⁷⁴ Halu kuteni mi lunge siñwañwa ni sikuwata sesi opela hande, ili kuli ba lifasi babone. Jesu naize, "Ha Ni ka nanuha kwa mwa lifasi, Ni ka hohela batu kamukana ku Na." Mi, "Yena wa swana maabani, kacenu, ni kuyakuile."

¹⁷⁵ Bazamaisi bakeni mwa Moya omunde, ni baopeli ni Muñoli wa pina, lika kaufela likaba hande. Kutuha fo, hakusana kunuha ka zona, lu itibahaza ni Yena cwale. Maheberu 13:8 ili, "Kiya swana maabani, kacenu, ni kuyakuile."

¹⁷⁶ Lu itibahaza ni Yena mwa Likezo 2. Lwa itibahaza ni bona, ka kolobezo yeswana, taba yeswana. Kaufela za Nali zona kwani ni zeo Ali zona, kaufela za Nali zona ni kaufela zeo Ali zona, kona ze luli zona. Sani ki sona luli.

¹⁷⁷ Ki nto yeswana fela sina ha Ni bata kuba mu American wa niti, Ni lukela ku itibahaza kwa lika kaufela za nani, zeo ali zona kaufela. Ni lukela ku zibahala ka zona, haiba Ni mu American wa niti.

¹⁷⁸ Haiba Ni mu American wa niti, konakuli Ni kile naca kwa likuhu zaba Plymouth Rock. Amen. Ni ezize, haiba Ni mu American. Ni mina kucwalo; mucile kwa likuhu za ba Plymouth Rock ni bashemi ba bazamai. Kwa likuhu za Plymouth Rock,

hane ba fitile fani, Ne nili ni bona; ni mina hamoho cwalo, mutu ni mutu.

¹⁷⁹ Ne ni zamaile ni Paul Revere, ona mwa mukwakwa wani, kwa ku mulemusa kozi. Yani ki niti luli.

¹⁸⁰ Ona kwanu kwa Musindi wa Forge, Ni silile nuka ya Delaware ye kangezi, ni sikhata sa masole, licika la bona, bene basina likatulo kwa mautu. Ne ni lapezi busihu kaufela ni George Washington, kwa makalelo. Ne ni silile nuka ya Delaware nina ni pono mwa pilu yaka. Luna lu ma American. Eeni, sha. Kwa Musindi wa Forge, Ne ni li kwateni.

¹⁸¹ Ne ni kutisize buitumelo ni bashemi bapili bene bafanga limpo za Buitumelo. Ne ni kutisize buitumelo ku Mulimu. Haiba Ni mu American wa niti, Ne ni itibahalize kwani kwa tafule.

¹⁸² Haiba Ni mu American wa luli, Ne ni itibahalize ha Ne ni yemi ni Stonewall Jackson.

¹⁸³ Haiba Ni mu American wa luli, Ne ni itibahalize kwa Mukiti wa kunwa Tii kwa Boston, eeni, sha, fani hane lu hanile kui kwahela lika kwa meto. Kulukile, Ni mu American wa luli. Ne ni itibahalize ni sani. Eeni, sha. Oh, mawi!

¹⁸⁴ Ne ni lizize Mulangu wa Tukuluho, zazi labu 4 lapili ka kweli ya Sikulu, mwa 1776. Ne ni lizize Mulangu wa Tukuluho kwanu ni ku zibahalisa kuli lu lukuluhile. Kuli seluli ma American ba niti, Ne ni na ni kueza cwalo.

¹⁸⁵ Ne ni itibahalize mwa maswabi a hae mwa Ndwa ya tukuluho, fani muzwale hana lwanile. Ne Ni na ni kulwala maswabi a hae, ona mo Ni lukela ku lwalela kanya ya hae. Haiba Ni mu American, Ni lukela kuba cwalo. Ne ni itibahalize ni yena. Eeni, sha.

¹⁸⁶ Ne ni itibahalize kwa Gettysburg kwatasi kwani, fani Lincoln hana file ngambolo ya hae. Eeni, sha.

¹⁸⁷ Ne nili kwa Wake Island, fa halimwa mibili ya masole yani yene tezi mali. Ne ni zuhile fa sooli sa Wake Island.

Fa Guam, Ne ni tusize kufufisa ndembela yani.

¹⁸⁸ Ni mu American wa niti. Amen. Zeo ali zona kaufela, kona mo Ni inezi, mi na ikuhumusa ka zona. Eeni, kaniti. Zeo America abile zona, zeo ali zona kaufela, Ni sali sina zona, kuba mu American. Lika kaufela za nali zona, Ni lukela kuba cwalo, kakuli Ni itibahaza ni yena.

¹⁸⁹ Taba yeswana, ka kuba Mukreste wa niti, mu lukela ku itibahaza ni zona.

¹⁹⁰ Ne ni katalize ni Mushe, ni kulemusa- . . . kamba ni Nuwe, ni kulemusa sicaba za katulo yene taha; kuba Mukreste wa niti.

¹⁹¹ Ne nili ni Mushe fa sicacani sene situka mulilo. Ne ni boni Siita sa Mulilo. Ne ni boni Kanya ya Hae. Ne nili ni Mushe kwani mwa lihalupa, kuba Mukreste. Ni lukela ku itibahaza ka lika

kaufela zeo Mulimu nali zona, kuba Mukreste. Ni boni kanya ya Hae. Ni utwile Linzwi la Hae. Musike mwa lika kutalusa lisili kuzwa kuna cwale, kakuli Ne ni liteni kwani. Na ziba se Ni bulela ka sona. Ni boni sene si ezahalile. Eeni, sha.

¹⁹² Ne nili kwa Liwate Lelifubelu, hane Ni boni Moya wa Mulimu hau shetumuka ni ku kauhanya mezi kwa neku leliñwi; isiñi mwahala mataka a nuka, ao balika kubulela kacenu, kono neli mwahala butelele bwa buliba bobu eza mashumi aketalizoho ka amane. Ne ni boni Moya wa Mulimu. Ne ni zamaile ni Mushe fa mubu o omile wani, kusila Liwate Lelifubelu.

¹⁹³ Neni yemi bukaufi ni Lilundu la Sinai mi nabona mishika ni mamonyi haliwa. Ne ni cile Maana ni bona kwani. Ne ni nwile mwa Licwe lani. Ni sa eza cwalo ni busihu bo. Ne ni itibahalize ni bene bacile Maana. Ne ni itibahalize ni bene ba nwile kwa Licwe.

¹⁹⁴ Ne ni itibahalize hape ni Joshua fani hana lizize tolombita, ni mamota a Jeriko ha welafafasi.

Ne nili mwa musima wa litau hamoho ni Daniele.

Ne nili mwa ondo ya mulilo o sabisa ni bana ba si Heberu.

Ne nili mwa Lilundu . . . ni Elia fa Lilundu la Karmele.

¹⁹⁵ Ne nili ni Joani Mukolobezi, mi fapila bahanyezi bani. Ne niboni Moya wa Mulimu ha ushetumuka. Ne ni utwile Linzwi la Mulimu halili, "Yo ki Mwanaka Ya latwa ye Ni katelwa kuina ku Yena." Eeni, sha. Na kaniti neni itibahalize ni yena. Yani ki niti luli.

¹⁹⁶ Ne ni itibahalize kwani kwa libita la Lazaro, ha Na zusize Lazaro. Ne ni itibahalize, musali fa siliba, fani ha Na mu bulelezi ka za libi za hae. Eeni, sha.

¹⁹⁷ Na kaniti ne ni itibahalize ni Yena mwa lifu la Hae. Mi Ne ni itibahalize la Paseka yapili. Ne ni zuhile ni Yena kwa bafu. Ne ni itibahalize ni Yena mwa lifu la Hae.

¹⁹⁸ Ne nili niba mwanda ni baba mashumi amabeli, mwa ndu yafa halimu. Ne ni itibahalize ni bona fahalimu fani. Yela! Ni—Ni ikutwa bulapeli. Oh, mawi! Ne ni itibahalize kwani. Ni alimuñwi wa bona. Ne ni itibahalize. Nina ni kutwisiso yeswana ni ye ba nani. Neni liteni kwani hane li ezahalile, kuba Mukreste wa niti. Neni boni Moya o mata ha ushetumuka. Ne ni liboni zani. Neni utwile mata a Mulimu ha Na nyanganya. Neni li ni bona bani bene ba bulela ka malimi. Neni utwile tozo hai taha kwani. Neni li ni bona. Neni itibahalize ni bona fani Moya o Kenile hano kalile kubulela ka malimi, ni bona.

¹⁹⁹ Neni li ni Pitrosi, fapila bahanyezi mwa Likezo 2, fani hana kutalize liñusa lelituna lani lana kutalize. Neni itibahalize ni yena. Eeni, sha.

²⁰⁰ Mwa Likezo 4, fani hane ba kopani hamoho, Neni li bo bona fani muyaho hau zikinyeha. Kasamulaho wa mukopano wa litapelo, muyaho wa zikinyeha mone one bali kuona. Neni itibahalize ni bona kwani ni bona.

Neni kutalize ni Paul kwa Mars Hill. Eeni, sha.

²⁰¹ Neni li ni Joani fa Soli sa Patimosi, ni kubona Kutaha Hae bubeli.

Neni li ni Luther mwahala ku cinca lika.

²⁰² Neni li ni Wesley, mucaindisi yani; yana byanguzwi mwa mulilo, fani hane kutile ndwa ya tukuluho yetuna kulwanisa keleke ya Anglican. Neni li kwani ni yena.

²⁰³ Mi kina yo Niteni mo busihu bo, 1964, mwa Philadelphia, Pennsylvania, ninze ni itibahaza ni mufuta oswana wa sicaba, ka kutwisiso ya mufuta oswana. Ni lukela kuba cwalo, kuba Mukreste. Ni lukela kuba ya itibahaza ko Linzwi la Mulimu li iponahaza. Ni itibahaza ni sikhata sesi ikutwa Moya wa Mulimu.

²⁰⁴ Ni itibahaza ni sikhata sesi ziba kuli U patuluhire, sesi ziba kuli Yena kiya swana maabani, kacenu, ni kuyakuile, sesi ziba kuli Bo ha ki buikangabeki. “Ki Jesu Kreste yaswana maabani, kacenu, ni kuyakuile.” Ni itibahaza ni sikhata se kwanu, busihu bwa kacenu. Ibo, ba bizwa kuli ki sikhata sa ba likaňi, ibo kanti ki sikhata sesi ipitezi, kwa neku la Linzwi la Mulimu. Kono, “Ha ni swabeli Evangelii ya Jesu Kreste, kakuli Ki mata a Mulimu aisa kwa puluso,” mi Na ni ya cwalo. Ni inzi ni bona beili maňolo apila ao Ni bulezi ka ona, ni pakilwe, Mulimu ya ipatile mwa mubonahalelo wa butu, mwa baana ni basali. Oh!

²⁰⁵ Mulimu mwa bu *en morphe* bwa Hae hape, uipatuluzi Iliyena ni kuikeza Yena muňi kuba ya zibahala kwa sicaba sa Hae. Mulena Yomutuna Yana beile kwatuko Kanya ya Hae. “Kakuli mwa nako nyana lifasi halina ku Ni bona. Ni ka patiwa ku bona. Kono mina mu ka Ni bona, kakuli Ni kaba ni mina, mane ni mwahali ku mina, mane ku yofita kwa maungulo, kucinca kuzwa ku Luther kuya ku Wesley, kuzwela pili cwalo cwalo, kuzwa kwa Kanya kuya kwa Kanya. Ni sali Mulimu yaswana yana pilile, ni kukutela kwa Kanya yeneli teni pili.” Haleluya!

²⁰⁶ U pazuzi lisila kaufela la likopano, kaufela sesi tibela mulumo. Mulumo wani obulela kuli, “Oh, bwani ki buikangabeki,” Na lobile kupunya kukena ku zani. Mulumo wa bubeli ono zwile mwani, noize, “Oh, batu bani ba lyangani,” Na lobile kupunya kukena mwa lisila lani. Eeni, Na ezize. “Oh, hamukoni kueza sani. Ha mu sesiňwi kwanda kuba sikhata sa baikangabeki.” Na lobile kupunya ku zani. “Hakuna sika sakuli foliso ya Bumulimu.” Na lobile kupunya ku zani, oh, mawi, kakuli Linzwi la Hae libulezi kuli Li ka eza cwalo. Hamukoni kukoma Linzwi la Mulimu.

²⁰⁷ Mi ki Yani uyemi fani, ibo, busihu bwa kacenu, Mutuli ya mata, kakuli Na lobile za Methodist kaufela, Baptist, Presbyterian, mufuta kaufela wa lisila. Usa yemi mwahala sicaba sa Hae, busihu bwa kacenu, hasika komiwa ka lizo. Mutuhele batu babulele ze babata ku bulela, baeze ze babata kueza, lika kaufela zeba bata kueza. Mulimu wa tahanga, kupunya kufita mwahala li sitataliso zani.

²⁰⁸ Mi muhupule, bani bulelela, kuli fulai hai fita fa sibaka sani, hakuna fo kufeleta lubilo lwa yona.

²⁰⁹ Na mi bulelela, hamu fita fa kutula museto wani wa lizo, kuli “Jesu ukutile hape, mi Yena hasali yo cwalo,” hamuka fumana kuli ki Ya swana maabani, kacenu ni kuyakuile, hakuna fo kufeleta mata ku seo Mulimu akona kueza mwa mukopano wo, ni kubonisa lifasi le seo batokwa: haki papali ya lifasi, kono kiancafazo ya lifasi yeka taza ni ku kolobeza ka Pata ya Mulimu ya pila, *en morphe* kui patulula Iliyena mwa nama ya butu. Haleluya! Na ilumela.

²¹⁰ I lobile li sitataliso kaufela, lisila kaufela, lisila kaufela! Hakuna se sikona kupata Pata ya Hae. Fani batu haba nani tala mwa lipilu za bona, kuna ni lisila leli itukisize kupazuha. Mwakona ku itinga fela ku sani. Li pazuzi lisila kaufela, ka Moya o Kenile wa Hae!

²¹¹ Mi ki Yani uyemi fani, busihu bwa kacenu, Mutuli ya mata, yaswana maabani, kacenu ni kuyakuile; kufolisa bakuli, ku kolobeza balumeli, sina fela Mwa eezanga kamita. Ki yena Mutuli ya mata. Diabolosi yaya kwa sinyeho uya amata. Eeni, sha. Kamita wa matanga kamita, haiba Yena aba teni.

²¹² Ka kukwala, Ni bulele cwana. Neku nani... Neni balile likande, lilimo zeñata, ka za mulizi wa kale wa violin. Na nani violin yana lekisa. Mukile mwa utwa likande le, linako zeñata. Mi neba bata kui lekisa ka taba yeñwi. Mi mulekisi ali, “Kimañi yaka nifa *bukana-ni-bukana*?” Na sepa na filwe mali a muwayawayawa alikaní, mwendi masentí alikana mashumi aketalizoho, kamba sesiñwi. “Kuya hañwi, kuya habeli,...”

²¹³ Ona fani, muuna yomuñwi ananuha mwa mulaho. Ki hali, “Fa muzuzu fela.” Mi kiha yema ni kuyo inga. Halu nahane ni kuli na lizize ye cwana:

Kuna ni Siliba sesitezi Mali,
Azwile mwa misinga ya Imanuele;
Baezalibi banwela mwatasa muunda wani,
Ba tamuluha kwa sibi kaufela.

²¹⁴ Mi hana i beile fafasi, nekusina yana i timile mwa sibaka. Mi kiha bulela kuli, “Kimañi yaka ileka?”

²¹⁵ Yomuñwi ali, “Likiti ze ketalizoho.” “Likiti ze mashumi amabeli.” Ne i sina teko. Kiñi? Muña—muña violin yani na patuluzi bunde bwa yona.

²¹⁶ Oh, muzwale, kezeli, cwale tuhela Muña Linzwi le, Yena yana Liñozi, Moya o Kenile omutuna, ku monyeha mubala wa lilato la Hae, ni kulibeya mwa lipilu za mina.

Kuna ni Siliba sesitezi Mali,
Azwile mwa misinga ya Imanuele.

²¹⁷ Muka bona butokwa bwa teni ka kutala, ni kubona Mulimu ya patuluhile ha taha kuto iponahaza mwa mubonahalelo. Kuli, Yena ki Ya swana fela sina mwa Na tezi ka Lizazi la Pentekota, fahalimwa sicaba, fani ha Na i *patuluzi* Iliyena, “kui kusufaza” kukena teni Mwani. Yani ki niti.

²¹⁸ Mu li, “Muzwale Branham, Ni likile. Ni likile. Ni ezize *sakuli, sani, ni sesiñwi*.”

²¹⁹ Zazi leliñwi Ne ni nani mukopano kwa Carlsbad, New Mexico. Mi ne luile ka nzila yetuna ye ya misima sima kwani. Mi ne ku sabisa hahulu, mi lwayo fita kwani. Mi muuna—muuna yani, hana fitile kwani mwa sibaka se, natilo—natilo tima malaiti. Mi, oh, mawi, mwakona ku nahana mone kubezi lififi. Fela ki . . . Ku unsufezi hahulu kuli mane mwakona kuutwa lififi lateni.

²²⁰ Mi cwalo kona moku inezi mwahala linako ze, halu bona keleke ye palelwa kulemuha Linzwi la Mulimu; hamu bona bana baluna ba basizana ba Sione habanze baeza lika zeo baezanga; hamu bona mizwale yaluna baba zuba ni kunwa, mi—mi babulela litaba za masila ni zeñwi, mi basa swalelezi kubulela kuli bainzi ku Kreste. Oh, mawi, ku unsufezi. Ki bunsu bo buswana sina sileze.

²²¹ Lubona sisupo sa Kutaha kwa Hae. Kukaba ni . . . Hañata kwa unsufalanga lisika pazula kale. Mi Naleli ya Kakusasana itaha kuto lumelisa musihali, ni ku li lwalela makande, ni kubonisa kutaha kwa lona. Mulemuhe.

²²² Mwahali mwani, hane ba timile zani, neku na ni musizana yomunyinyani yana tilo huwa ka kutumusa linzwi la hae. Neku nani mushimaní nyana yana yemi bukaufi ni muzamaisi, mi abona muzamaisi yani hana tima malaiti ani cwalo. Mi kezeli yomunyinyani yani nali fakaufi ni kuba ni kanono. Nasweli ku huwa, ku tulaka tulaka. “Oh! Kiñi sesika ezahala kuzwa fa? Ki butata mañi? Ki butata mañi?”

²²³ Mwa ziba sana huwezi? Ki hali, “Usike wa saba, kezeli yomunyinyani. Kuna ni mutu fa yakona ku monyeha liseli.”

²²⁴ Teeleza, kezeli yomunyinyani, mukona ku nahana kuli luba banyinyani mi lu baba likani. Kono, usike wa saba. Kuna ni Mutu fa Yakona ku monyeha Liseli. Wani ki Moya o Kenile. Mwa lumela nji? [Puteho ili, “Amen.”—Mu.]

²²⁵ Halu inamiseni litoho zaluna fa nako nyana. Mu ni swalele ka ku mi buluka nako yetelele.

²²⁶ O Mulimu yomutuna wa Lihalimu, kui patulula Iliwena, ku iponahaza Iliwena, uitibahaze Wena muñi, Mulena yomutuna wa Kanya, unge litaluso ze likani ze, busihu bwa kacenu, mi likone kuwela fa lipilu za sicaba. Mi lukone kubona yani Ya patuluzwi, yena Yani Yana tile ni kuto pazula lisila la mwa tempele; mi ni kuzwa mwa lisila lani, ataha mwahala lisila la butu hape, ka Lizazi la Pentekota; ubile ya swana kamita, kucinca kwa Kanya kuya kwa Kanya.

²²⁷ Mi cwale lu kutile hape sina libupiwa kaufela, kueza, kukutela kwa Peu ya makalelo, kuzwa mwa nako yeñwi ya keleke kuya ku yeñwi. Mi mwa lusika lwa mafelelezo lo fa, ki luna ba, lu kutezi kwa Taba yapili yene wile ka Lizazi la Pentekota, kwa kutaleleza Mañolo kaufela, “Liseli mwa nako ya manzibwana,” mi, “Misebezi ye Ni eza muka ieza ni mina hape,” ni lika zeñata zo No sepisize mwa Linzwi la Hao.

²²⁸ Ndate, haiba kuna ni alimuñwi mo yasika fita kale mwa lisila lani haisali, kamba haiba kuna ni alimuñwi mo yana likanyisa fela yomuñwi yakile akena mwa lisila lani, ufe muhau busihu bo, Ndate. Hakone kubona Mutuli ya mata yani inza yemi mo, atezi muhau ni mata, kwa ku swalela. Lumeleza cwalo, Ndate.

²²⁹ Mi litoho zaluna halinze li inami, kana kuka fumaneha babañwi mwahali mo? Ki babakai, mwendi Ni bulele kuli, baba kali, “Muzwale Branham, Ni nanula lizoho laka. Uni lapelele”? Mube baba inamisize litoho za mina, mi mu nanule lizoho, “Ni bata ku fita ni punye mwa lisila kaufela, kufitela Ni kona kubona Mutuli.” Mulimu ami fuyole. Mawi, ki ao mazoho! Fa malibela afa halimu, kwa neku la silyo? Mulimu ami fuyole. Malibela akwa mulaho? Muyeme... Mulimu ami fuyole. Mube baba sephahala luli. Kwa neku la nzohoto? Munanule mazoho amina, muli, “Muzwale Branham, mwendi Ni bile Mukreste fa myaha luli, kono, luli, ha Ni sika fita kale mwa lisila lani. Ha Ni sikabe nieza cwalo ni haisali. Hanina Sani sene bana ni sona kwa mulaho kwani.” Kacenu, luna ni... “Na ni simela sesi inelezi fo sicalezwi.”

²³⁰ Hamunga palisa ye hulezi mwa sibaka seicalezwi, mulukela kui babalela sina mbututu, ku i shembashemba, ku i sela mulyani, ku i selaela mezi. Kono simela sani sesi i melela kwande kwani mwa lihalupa, mufuta oswana wa palisa, ubonahala sina yona; hai fumani mezi ni amanyinyani, kono hakuna likokwani ze kena ku yona. Ki butata. Ki ya niti.

²³¹ Kana mwa kona ku bapisa Bukreste ni Bukreste kacenu, ni sene buli sona kwani? Kana mwakona ku nahana sikwata se, se lubiza kuli Bukreste kacenu, mwahala lifasi, kuba sina bani bene bali mwa mulaho wa Pentekota; baba kombelelwa sina limbututu ni ku shembashembiwa, mi kuzwa kwa keleke iliñwi kuya ku yeñwi, mi, kubulela sika se mu sa lati, ku nanuha ni

kuzwela fande? Mi, oh, mwakona kunahaniseza sani? Batili. Ki butata mañi? Ki kupepana.

²³² Michelangelo, yani yana bupile siswaniso sa Mushe, mwakona kuba ni kupepana kwa sani, ka kucipa luli. Kono, sa pili?

²³³ Yani yana swanisize siswaniso sa Mulalelo wa Mulena, Na sepa siswaniso sapili sani ne sika lekiwa ma dollar aeza lule lule, haiba nemuka kona nihaiba kuleka. Hanizibi mane kuli ikai cwale. Kono mwakona kuleka yeñwi yecipile ye tahile ka yona ka ma dollar aeza mwanda ni mashumi aketalizoho ka amane ni masenti alikani. Mwa kona.

²³⁴ Mi cwalo kona mo ku inezi kacenu. Mukreste ya cipile, ye pepilwe, mutu ya i kopanya fela kwa keleke, mwa kona ku mu lekela kwai kamba neba—kamba neba bucwala. Kamba, kuli musali akute millili ya hae kamba kupenta milomo, mwa kona ku mu lekela sika kaufela sa mifuta ya lifasi. Kono hamukoni kuswala yani ya niti.

²³⁵ Ni Mu boni ka kutala, yena yaswana maabani, kacenu, ni kuyakuile.

²³⁶ Oh, Mukreste, kikuli ha ulati kuba Mukreste wa niti? Haiba kuna ni yana sika nanula lizoho la hae, kana muka eza cwalo? Kulukile, Niya fela kwa kulapela. Mulimu ami fuyole. Mulimu ami fuyole. Oh, sani ki sesinde luli. Mutualime fela fani.

²³⁷ Ndata Luna yakwa Lihalimu, “Linzwi la Hao halina kukuta ku Wena mukungulu.” Ki Wena yana file sepiso. Nani buikalabelo ka kubulela kuli ki Wena ya Libulezi. Na ni kutela fela Manzwi a Hao. No ize, “Ya utwa Linzwi la Ka, ni kulumela ku Ya Ni lumile, una ni Bupilo bwa Kuyakuile.” No sepisize cwalo.

²³⁸ Mi, Mulena, luziba kuli luna ni zeñata za zona zani kacenu, babañata baba bulela kuli balumela, ibo, haba lumeli. Kwa iponahaza. Kono, Mulena, kuna ni babañwi ba niti, nibona.

²³⁹ Ni lapela kuli U lumeleze fela, mwahali mo, busihu bwa kacenu, kuli muuna kaufela ni musali, mushimani ni musizana, hakuna taba ka na ha yebali ku yona, mubala oba nani, keleke kaufela yeba fumaneha kuyona, O Mulimu, uba kulise. Haba babone ponahazo yani ya Jesu ya swana kacenu, ona mwahala luna, sina ha Na li ka Lizazi la Pentekota, ha Na i patuluzi Yena muñi kwa lusika lo, kakuba Moya o Kenile. U lumeleze cwalo, ka ku bona Manzwi atalelezwa, sipolofita sa ezahala!

²⁴⁰ Lwa bapisa, kacenu, sesi bizwa keleke ya lifasi kwani, Katengo ka Likeleke za Lifasi, ni ku bapisa sani kwa sepiso ya Pentekota? Hakuna kuswana, ni hanyinyani. Halukoni kunga libyana zaluna za masila kuli litapiswe fa tikiti.

²⁴¹ Kono, Mulena Mulimu, haiba luka kuta kwa Sibuba sani, kuna ni musebezi wa kukeniswa, konakuli kutwisiso ya luna

ni Linzwi la Mulimu lika zamaelela yeñwi ni yeñwi. Konakuli, lwakona kuikungela sifumu saluna. U lumeleze, Mulena, busihu bwa kacenu, ha Ni nze ni beya sicaba se mwa mazoho a Hao. Ufe ku mutu ni mutu ze lutokwa, Ndate. Lwa li kupa ka Libizo la Jesu. Amen.

²⁴² Mulimu ami fuyole. Ni itumezi, hahulu, ka kuyema, kulibeleta fa nako yetelele. Mi mu Ni swalele Ni mi bulukile mizuzu ye lishumi hasamulaho wa teni. Mulimu abe ni mina kufitela Ni mibona kakusasana. Ni sikululela sebelezo cwale ku, Na sepa, ku muzamaisi wa sebelezo.



MULIMU YAMATA HAIPATULULA FAPILA LUNA LOZ64-0629
(The Mighty God Unveiled Before Us)

Liñusa le ka Muzwale William Marrion Branham neli katalizwe lwapili mwa Sikuwa la Mubulo manzibwana, Mbuwana 29, 1964, mwa mukopano waba Full Gospel Business Men's Fellowship International ili kwa Bellevue-Stratford Hotel mwa Philadelphia, Pennsylvania, U.S.A., liingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi ne i hatisizwe ni ku hasanyiwa ki ba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org